



天津交通銀行同  
人俱樂部圖書室

左文襄公奏稿卷四十八

起光緒二年丙子正月訖七月

目錄

哈密辦事大臣裁併營伍請 敕撥專餉摺

新疆北路臺站應由烏科等處大臣安設片

請 敕催山東等省應解塔城專餉片

關隴肅清彙案保獎摺

各省關籌解協餉及各項差使出力人員彙案請 獎摺

部駁辦捐籌餉各員另核請 獎摺

請加甘肅文闡鄉試永遠中額摺

遵保記名提鎮各員摺

奏稿卷四十八目錄

請添設平遠海城兩縣學額摺

會報抵蘭出塞日期摺

新疆賊勢大概片

覆陳借用洋款并催解協餉摺

刊用木質關防一切案件分別辦理片

道員王加敏懇 予獎敘片

馳抵肅州各軍分起出關摺

額馮兩軍進攻瑪納斯城失利大概情形片

欽奉 恩諭擬緩借洋款摺

請 敕直隸等省迅解塔城索倫營協餉片



徐占彪丁憂畱營片

出關諸軍進至古城畱防要隘摺

覆陳杜賊紛竄情形摺

北路糧運情形并委副都統喜勝督辦歸包局務片

會師攻拔古牧地堅巢克復烏魯木齊迪化州城大概情形

摺

遵查吉爾洪額揭參金順各款失實摺

吉爾洪額等俟押解進關訊供請 旨片

哈密威儀軍應行汰併摺

奏稿卷四十八目錄

哈密辦事大臣裁併營伍請

敕撥專餉摺

光緒二年正月初三日會銜

奏爲哈密辦事大臣兼帶馬步裁併實數籲懇

天恩敕撥有著專款定限撥解以資整頓恭摺馳陳仰祈

聖鑒事竊哈密巴里坤古城所駐各大臣應就見存旂營覈定糧餉如缺額過多准照舊額馬步挑補足數但責其保守城池不必責以戰事脫屯丁伍籍散之歸農業經奏准通行在案其文麟兼帶威儀馬步內步隊各營查係同治六年以後收輯關內外流亡丁口分屯安西哈密塔爾納沁等處雖挂名伍籍緩急難恃所稱專餉除新疆月餉七萬兩經榮全等奏准每月由劃解烏魯木齊都統一半內分撥哈密一萬四千兩欠解雖多款尙有著其餘巴

奏稿卷四十八

哈分成餉暨同治六年以後疊次奏提哈密專餉糧價等銀均係隨時指提非如金順明春等軍專餉由部臣核定每月若干分省指提專款收解短欠按月報部催提之比其哈密開屯事宜自張曜到彼由臣籌墊經費與文麟張曜商辦修濬水渠分段開屯漸收成效然文麟今年屯糧據報僅敷一月軍食准文麟咨稱該軍糧餉兩絀請由臣籌撥核奏臣比屬其欽遵前奉

諭旨大加裁減酌畱精壯數營開造花名奏咨辦理并於無可騰挪之中墊撥銀一萬兩俾濟急用嗣奉

諭旨文麟奏瀝陳需餉迫切情形請敕迅速籌撥一摺哈密各營月餉積欠甚鉅情形困苦飢潰堪虞亟應籌撥餉銀以資接濟該

辦事大臣已照左宗棠所咨裁汰兩營弁勇以爲撙節餉糈之策見在存營弁勇計共四千人卽著左宗棠按照楚軍章程將該軍馬步八營月餉速爲籌撥并於前次借撥一萬兩外再行借撥銀數萬兩發交文麟所派在省請餉委員星速解赴該城以濟要需毋得意存膜視欽此等因正議奏覆閒適准文麟移送續裁馬步清冊到臣內開步隊兩營每營正勇五百名連營哨兵弁子藥公私長夫共七百八員名馬隊兩營以二百五十騎爲一營每營連營哨官弁長夫共五百八員名又馬步小隊二百名管帶官弁五員名以上馬步通共官弁勇夫二千六百四十員名又隨營辦理各營務各項差使文武員弁一百八十餘員車駝夫丁匠作斗書跟役四百三十餘名裁撤餘丁八百名仍就哈密沁城兩堡分爲十屯設管理屯田官役三十三員名咨請分別核奏前來較之前次自奏裁減兩營外復裁汰數百名惟未據將需餉若干約定成數若遵

奏稿卷四十八

二

諭旨按臣軍奏定餉章核估計馬步四營又二百名一月共需正餉草乾等銀計一萬三千三百餘兩合之糧價津貼及軍需等款每月數千兩約共需銀二萬兩以一年計之卽需銀二十四萬兩應否仰懇

天恩敕下部臣仍就原協哈密軍餉省分指定每省每月協濟若干按年按月定限撥解遇閏照加不准緩欠從前積欠哈密軍餉

應否分年勻解抑或劃斷舊欠從新核撥以清起訖通由戶部奏明辦理如遇協餉遲到仍由文麟查照臣軍章程按月發給鹽糧乾銀公費以資點綴臣軍餉項積欠已至二千七百餘萬兩更何能舍己芸人爲文麟代籌挪墊惟文麟既自知餉源涸絕復行裁減願比楚軍發餉章程臣亦未便恣置擬於該軍協餉遲到時略與通融但未可恃以爲常耳至哈密沁城見分十屯自應由文麟查照臣前奏准原案按丁授地酌發牛籽收穫後繳本歸官餘糧仍照時價買供軍食官私兩益毋須另請經費其額設哈密辦事大臣經費向例每五年關銀五萬兩久已停解文麟此時兼帶馬步自可毋庸另請經費而哈密協營新募土兵八十名業由臣核准查照安西各營餉折見章權歸軍需請領該廳通判准照內地停征州縣例支給薪公銀兩統由臣軍餉項挪墊作正開銷自無須文麟籌給所有文麟兼帶馬步遵

旨裁併實數懇

恩敕撥有著專款定限撥解各情謹會同幫辦新疆軍務大臣烏魯木齊都統臣金順合詞恭摺馳陳伏乞

皇太后

皇上聖鑒訓示謹奏再部撥景廉庫帑三十萬兩改由臣派員領收內除解過金順原封庫平銀二十萬兩由其自行造銷外茲特劃解銀一萬兩交文麟具領作爲裁併等費餘銀如何分撥容臣

彙案據實開報合併陳明  
軍機大臣奉  
旨戶部議奏欽此

奏稿卷四十八

新疆北路臺站應由烏科等處大臣安設片

光緒二年正月  
初三日

再臣承准軍機大臣字寄光緒元年五月十五日奉

上諭慶春等奏軍臺差務繁重請照舊制分路應付一摺察哈爾所屬臺站見在駝馬倒斃各臺力難支持亟應分路應付以期無誤要差著左宗棠體察情形飭屬趕緊設復驛站分路供應以歸舊制等因欽此竊維甘省兵燹之後玉關內外舊設塘驛全行廢弛臣軍度隴凡緊要文報均飭沿途駐紮防營專馬馳遞月給犒賞事平則令次第設驛圖之數年始於關內各正驛及關外玉門敦煌安西各驛一律設復而安設之費及歲需經費概於軍餉中挪用近時新疆用兵軍塘之急宜安設又不待言惟餉需奇絀無從籌此鉅款不得已權商金順張曜於巴哈古城一帶各飭所部分段安設馬撥馳遞文報照章給以犒賞俟塘站次第興復再議停止至慶春等原奏以烏科庫倫塔爾巴哈臺等城征防員弁赴各省提餉及採辦軍裝等件悉由軍臺運解差務繁重請復嘉峪關正驛分路供應臣查烏科庫倫各城悉在新疆北路該各城差員由北路軍臺行走不由嘉峪關是北路臺站應由烏魯木齊都統科布多大臣烏里雅蘇臺將軍聯次安設臺站向章不由關內安設也除咨烏魯木齊都統外謹附片陳明伏乞

聖鑒謹 奏

軍機大臣奉

旨知道了欽此

奏稿卷四十八

六

請 敕催山東等省應解塔城專餉片

光緒二年正月  
初三日

再臣於光緒元年十二月二十五日准塔爾巴哈臺參贊大臣英廉咨稱戶部議奏塔城每年須加撥銀三萬兩應令臣查明該城餉需如果實在不敷必需添撥卽奏明辦理等因查塔城每歲專餉十二萬兩於奏調直隸宣化官兵等未經到防之先尙可撙節支用如宣化官兵等到防每年必請加撥銀三萬兩始資敷衍又此次部撥塔城餉銀二十萬兩於解到後除找放各款及歸還烏里雅蘇臺墊買安臺駝馬價銀暨還伊犁將軍借項外僅存銀五萬餘兩開放鹽糧月餉僅可支至光緒二年正月二月間其各省應撥專餉迄未報解不得不豫爲籌畫免誤要需等因咨臣核奏前來臣維英廉前請每歲加撥銀三萬兩係備撥宣化官兵到防之用此時該官兵既未到防自毋庸加撥惟咨稱山東山西河南陝西安徽等省應撥塔城專餉迄未報解待餉孔殷應請旨敕催該各省撫臣轉飭藩司迅將欠解應解塔城專餉如數籌撥運解軍前以濟要需謹附片具陳伏乞

聖鑒訓示謹 奏

軍機大臣奉

旨另有旨欽此同日承准知會本日貴督具奏請

敕催山東等省撥解塔城專餉一片已奉有寄信

諭旨令裕祿等如數籌撥矣

關隴肅清彙案保獎摺

光緒二年正月初五日

奏爲關隴肅清所有在事出力文武員弁兵勇彙案保獎仰祈

聖鑒事竊臣前奏報克復肅州城垣盡殲醜虜甘肅關內一律肅

清同治十二年十月二十四日內閣奉

上諭左宗棠金順奏克復肅州城垣首要各逆殲滅淨盡請將出力各員獎敘一摺其餘尤爲出力將領員弁卽著查明保奏候朕施恩等因欽此恭錄

恩旨宣示諸軍莫不感戴

皇仁歡欣鼓舞竊微臣自奉

命西征正值逆回猖獗土匪捻匪內外交訌諸將士勦力同心分

奏稿卷四十八

八

途勦辦得以綏定陝疆移師度隴其時隴中已無完土彌望白骨黃茅炊煙斷絕甯夏河湟酒泉諸逆回各據一方互相首尾而陝回敗遁入隴者又相與勾結蜂屯螳聚凶燄彌張土匪縱橫乘時并起加之荆棘塞途饋餉紆阻沙飛溜濁雪虐風饑師行艱難百倍內地度隴諸軍荷

聖澤之涵濡宣

皇威以撻伐肅將

天討迅赴戎機大小數百戰然後金積蕩平甯靈底定河州西甯以次攻克積年劇賊渠目悉就殲夷旋復會師肅州礮諸兇豎傳檄玉關以西餘威仍震其間叛將潰弁土匪游勇及就撫復變逆

回隨時擒誅追捕各伏其辜隴患悉平以戰功論居前敵者風馳電掣迅掃羣兇其勞烈顯而易見疊蒙

恩旨甄敘固已羣情鼓舞士氣常新惟隴境廣袤數千里土曠人稀亂後子遺僅存不及平時十之一二畱防後路各軍不但護運道以利轉饋殄餘匪以保殘黎并宜代民墾荒播種以廣招徠修城築堡以利居止然後民可復業也治道路以通車馱濬泉井以便汲飲栽官樹以蔭商旅然後民可資生也至就地引渠漑地變渴壤而爲沃土去害就利拔妖卉而植蔬苗崇學宮立社廟修衙署驛舍凡地方官私應興復而必資民力者後路各軍皆於操防護運之暇併力爲之臣於驗工時察其工程堅固可規久遠者給

奏稿卷四十八

九

子賞犒以慰勞之耕穫糧料草束亦照市價收買於是防營競勸爭相仿效凡設防置戍之處雖殘破至極頻年次第完繕農安其野商出其途東自涇州西至安西哈密盜賊衰息諸廢漸舉均欣欣然而有生氣是無兵屯民屯之名而實效固有可觀也臣當時艱孔亟饟源枯竭之際未敢以善後名目另款請銷均於軍餉通挪支給各營於且戰且防之暇藉兵勇以代民力惟日孜孜如營其私其勞績亦實有未可掩抑者據各路統領官開單請獎前來詳加覆核除戰功應遵

旨彙獎各員弁勇丁擬保稍優外其捕治匪犯會記功次防護運道厯無貽誤及營治各項工程有益官私者均照常擬保以示區

分雖爲時既久人數較多而核實開單并無冒濫謹繕單恭呈  
御覽至各省歷年籌餉及各項差使出力員弁均另摺彙保其藍  
翎千總以下各弁照例咨部註冊伏懇

天恩允加獎敘并免填註考語以示獎勵庶償前勞而策後效微  
臣亦得所藉手勉效馳驅謹恭摺具奏伏乞

皇太后

皇上聖鑒訓示施行謹 奏

光緒二年二月初四日內閣奉

上諭左宗棠奏遵保關隴肅清出力員弁彙案開單請獎一摺甘  
肅逆回倡亂經左宗棠督師勦辦次第蕩平同治十二年秋閒肅  
州克復以後關內一律肅清在事各員弁或效力行間或防護遵  
道其辦理善後事宜各員亦均著有微勞自應量予獎勵所有單  
開各員弁均著照所保官階獎勵該部知道欽此

各省關籌解協餉及各項差使出力人員彙案請

獎摺

光緒二年正月

初六

奏爲關隴肅清所有各省關籌解協餉及各項差使出力文武員弁彙爲一案請獎恭摺仰祈

聖鑒事竊維甘肅軍事以籌糧籌運爲最難而採糧轉運又均非巨餉不辦轄境苦瘠甲於天下地廣人稀回亂以來僅存子遺不及承平時十分之一非賴各省關協濟無所措手仰仗

皇威遐颺東自潼關武關西訖嘉峪南自巴蜀北至蒙古周數萬里一律澄清是則疆圻諸臣之大有造於西土也總核西征糧臺開送各省關連年籌解協餉銀數清單如福州將軍督理閩海關

奏稿卷四十八

十一

文煜前兩江總督李宗義湖廣總督李瀚章前任江西巡撫升任兩廣總督劉坤一四川總督吳棠前署兩江總督江蘇巡撫何璟浙江巡撫楊昌濬廣東巡撫張兆棟山東巡撫丁寶楨前署山東巡撫漕運總督文彬安徽巡撫裕祿前任湖北巡撫郭柏蔭前任江蘇巡撫張樹聲前任山西藩司升任河南巡撫李慶翱前任江西藩司升任江西巡撫劉秉璋署漕運總督江蘇布政使恩錫於西征餉事均極盡心凡可設措之處無不力爲經營以求有濟惟彼此均膺疆圻重任誼在奉公臣不敢代爲妄請

獎敘其協解成數多寡款目分明臣亦無庸掩飾也其各省關司道監督籌解協餉實數有五分以上者有至十分者皆能顧全大

局力濟時艱解餉各員歷奉委解勞瘁不辭亦無貽誤自應併案  
獎敘茲核明勞績分別繕單具陳籲懇

恩施又隴中用兵芻糧轉饋非數路并籌難資接濟勞費未可殫  
述軍裝子藥及軍需一切應用之物多取資他省水路迢遞轉輓  
繁難除糧臺及採運局外非沿途設局督催接運地方州縣悉心  
照料不能妥速局員非實心奉公廉能耐苦又無以勝繁劇而任  
險艱然有志之士每謂軍前差使著績不同輒思赴前敵圖功致  
後路委員翻有乏才之歎臣因擇年勞最久才具素優者多方激  
勵許以辦理周妥一體敘功故數年來在事員弁各知奮興軍用  
得無缺乏至本省各屬印委辦理善後百廢具興雖屬分所應爲  
然當此三空四盡之時拮据不遑猶能勉趨公經營就緒勞績  
亦異尋常據各路臺局及本省司道開單請保前來臣詳加覆核  
其在事出力未久者均一律核刪俟續有勞績另行彙案辦理俾  
昭核實所有此次列保文武員弁均盡心職守出力有年保獎階  
級雖略有與部章所謂尋常勞績不符者究與各軍營已有區別  
謹一併繕列清單恭呈

御覽伏懇

聖慈免其分別註考

准予獎敘以示鼓勵庶羣材競奮臣得收爲指臂之助稍展尺寸  
之效矣其藍翎千總以下各弁均彙單咨部合併陳明伏乞

皇太后

皇上聖鑒訓示施行謹 奏

軍機大臣奉

旨該部議奏單一件併發欽此

奏稿卷四十八

三

部駁辦捐籌餉各員另核請

獎摺

光緒二年正月初六日

奏爲部駁辦理甘捐籌解協餉出力請獎各員謹照章另行分別酌擬繕單具陳恭摺仰祈

聖鑒事竊查各省辦理甘捐并籌解協餉出力各員前經臣開列清單具奏請獎欽奉

諭旨著該部議奏欽此旋准部覆以原奏清單內僅聲敘各員隨辦甘捐積有成數未經詳敘各局收捐年月日其各員內有收解釐金籌辦協餉轉運前敵冒險任勞亦未分晰指實何員專係何項勞績礙難核議奏明行查等因當經咨會前辦西征糧臺兼管甘捐總局戶部侍郎袁保恆分晰查明咨臣繕單奏請

奏稿卷四十八

西

敕部核獎嗣准部咨分別准駁開單具奏奉

旨依議欽此轉行知照前來復經臣咨會袁保恆查照去後接准咨覆將部駁核與章程不符行令另核請獎各員按照章程另行酌擬咨請具奏給獎俾免向隅等因前來臣覆核無異相應繕列清單請

旨敕部覆核給獎以示鼓勵除咨部外謹繕摺具陳伏乞

皇太后

皇上聖鑒訓示施行謹 奏

軍機大臣奉

旨該部議奏單併發欽此

軍機大臣字寄光緒二年正月初七日奉

上諭前據左宗棠奏出關需餉孔亟擬借洋款由沈葆楨查照臺防成議辦理當交該衙門速議具奏茲據總理各國事務衙門戶部奏稱西征軍務緊要請敕各省迅解協餉并准其借用洋款等語西征軍餉前經該部議令將上年指撥各省關的餉一百二十萬兩由該將軍督撫查明欠解若干限一箇月內全解至積欠西征軍餉二千六百十餘萬兩限一年內提解一半并經該部會同總理各國事務衙門奏明各督撫應將西征海防各餉各按各款清解不得因有海防撥款將西征各餉延欠嗣經譚鍾麟奏請提年終一月滿餉該部議照成案於浙江等省積欠協餉內提銀六

奏稿卷四十八

五

十萬兩據左宗棠奏稱各省關應解協餉截至上年十月止僅收過銀二百六十餘萬兩比常年短至一半其指提年終一月滿餉僅據浙江四川山西報解銀十五萬兩此外尙未起解實屬延玩著該將軍督撫遵奉前旨查照該部各前奏將指撥出關的餉及年終一月滿餉卽行照數完解不准稍有蒂欠各省關原協添協西征各餉江蘇月協銀八萬兩江西月協銀六萬兩福建月協銀四萬兩河南月協銀一萬五千兩除同治十二年改撥毅軍運費外仍月協穆圖善餉銀一萬兩湖北月協并應協穆圖善餉銀八萬兩廣東月協銀七萬兩湖南月協銀一萬兩山東月協銀一萬二千兩山西月協并應協穆圖善餉銀五萬兩又河東月協雷正

綰餉銀五千兩安徽月協銀二萬兩四川月協銀四萬兩閩海關  
月協雷正綰餉銀二萬兩浙江月協銀十二萬兩各該省歷年撥  
解之數有過半者有不及一半者惟湖南止解三分之一河南撥  
解不及十分之一廣東福建四川欠解亦多殊屬不成事體著將  
河南暨湖南廣東福建四川各藩司先行交部議處并著照所議  
將光緒元年以前積欠舊餉除專案指提外暫予緩解其自光緒  
二年起所有應協西征新餉著該將軍督撫查照每年應協款目  
按三四年前撥解之數力籌措解統於每年年終覈計如不能照  
原撥添撥數目解至八成以上卽將該藩司監督照貽誤京餉例  
由該部指名嚴參該將軍督撫務當實力督催嚴飭各該藩司監

奏稿卷四十八

六

督按月源源報解俾濟要需至借用洋款本非善策前經該衙門  
奏明嗣後無論何省不得輒向洋人籌借惟左宗棠因出關餉需  
緊迫擬借洋款一千萬兩事非得已若不准如所請誠恐該大臣  
無所措手於西陲大局殊有關繫著沈葆楨卽照左宗棠所奏妥  
速籌議奏明辦理以期無誤事機除按照成案由各關分年撥還  
洋商外卽由該部所議各省應協西征新餉款內自本年起分年  
撥還國家經費有常此次籌借鉅款係合天下之力辦西陲軍事  
竭十餘年之力辦今日軍事似此辦法實屬可一而不可再左宗  
棠當仰體朝廷籌餉之艱振刷精神將新疆軍務迅速籌辦著卽  
會商金順簡選精銳鼓行而西以次剿除烏魯木齊吐魯番等處

賊匪綏靖邊疆總期早日告竣藉紓餉力儻稍事遷延徒糜鉅款  
則以後供支勢將曷繼左宗棠素顧大局諒不至日久無功致干  
懲處也將此由六百里諭知左宗棠文煜沈葆楨李鶴年劉坤一  
翁同龢張兆棟吳元炳裕祿劉秉璋楊昌濬丁日昌丁寶楨鮑源  
深李慶翱譚鍾麟王文韶并傳諭文格李文敏知之欽此

奏稿卷四十八

請加甘肅文闈鄉試永遠中額摺

光緒二年正月  
初八日

奏爲請加甘肅文闈鄉試永遠中額以廣

皇仁恭摺仰祈

聖鑒事竊維甘肅分闈就試前經臣援照成案奏懇增額九名并將甘肅各屬捐輸銀數請加永遠中額十名合分額二十一名共計甘肅應得中額四十名嗣經部議准增額九名分額二十一名共三十名作爲甘肅中額其甘肅全省捐輸請廣永額十名查外省捐輸概不准請加永額業由部於同治十三年十一月間奏奉諭旨立案所請加廣永遠中額應毋庸議等因比卽分行遵照茲據各屬紳士公稟甘肅軍興以來捐輸各項經費共銀五千餘萬兩納捐皆在同治十三年十一月以前非在部議新章之後請廣文闈鄉試中額似無不合且光緒元年十一月間雲南撫臣岑毓英亦以往年捐輸請加永額部議與新章不符改爲暫額復經岑毓英以雲南紳民竭力捐輸十有餘年核計捐銀一千零七十餘萬兩未請加廣中額奏蒙

奏稿四十八

六

特恩准於雲南文武鄉試各加永遠中額十名甘肅捐輸較之雲南增過三倍援案請加永額似可仰邀

恩准等情請奏前來臣維甘肅瘠苦本較各省爲最時值兵燹物力尤艱各屬士民猶能踴躍捐輸先後積銀至五千餘萬兩之多情殊可嘉亦極可憫茲雲南捐輸渥蒙

特恩加廣文武鄉試永遠中額各十名甘肅捐輸鉅款請加文闈中額事同一律自應據情籲懇

天恩逾格

特准將甘肅捐輸鉅款

賞加文闈鄉試永遠中額十名卽以光緒二年丙子正科爲始俾邊陲寒賸得免向隅庶

聖化覃敷地方更可收經正民興之效矣除咨明各部外謹繕摺具奏伏乞

皇太后

皇上聖鑒訓示施行謹 奏

奏稿四十八

五

光緒二年二月初五日內閣奉

上諭前據左宗棠奏請加甘肅永遠中額十名當經部議與新章不符茲復據該督奏稱甘肅自軍興以來各屬士民捐輸覈計銀數至五千餘萬兩之多皆在同治十三年十一月以前非在部議新章之後請加甘肅文闈鄉試永遠中額十名等語加恩著照所請加甘肅文闈鄉試永遠中額十名卽以光緒二年丙子正科爲始用示嘉惠士林至意該部知道欽此

遵保記名提鎮各員摺

光緒二年正月二十二日

奏爲遵

旨覆陳恭摺仰祈

聖鑒事竊臣接准兵部咨開內閣鈔出光緒元年十二月初十日奉

上諭軍興以來各路統兵大臣督撫保舉記名提鎮各員其中才略出眾卓著戰功者固不乏人而人數眾多亦難免有庸劣之員濫竽附入著各路統兵大臣督撫於記名提鎮各員內悉心考察如有實在堪勝專閫之任者再行出具切實考語奏明存記以備簡用若才具平庸不能稱職或著有劣迹者卽著嚴加甄別據實奏參毋得稍涉隱徇以副朝廷慎選人材至意將此通諭知之欽此欽遵由部恭錄咨會并令轉行新疆統兵大臣一體遵照等因比卽移行在案所有臣軍記名提鎮人員除已擇尤註考借補副參遊各缺請

旨敕部議覆外謹將才略出眾卓著戰功堪勝專閫之任者先行開列銜名出具考語繕單恭呈

御覽查堪膺列保員數尙多容卽悉心考察隨時舉劾用副

皇上拔選真材至意謹恭摺具陳伏乞

皇太后

皇上聖鑒訓示謹 奏

謹將會保提督各員開列清單填註考語恭呈

御覽

頭品頂帶陝甘題奏提督伯奇巴圖魯譚上連忠實勇敢沈靜廉慎疊次衝鋒陷陣身受重傷而意氣奮揚不避艱險持已謙約御下寬簡蓋將材中之以度量著者

頭品頂帶補用提督那爾琿巴圖魯鄧榮佳鋒厲無前器局深穩每戰必克口不言功所至之處不犯秋毫并能助民興利蓋將材中之以品概著者

記名提督額爾克巴圖魯戴宏勝精銳整練能衝能堵臨財廉恤下厚饒有膽識蓋將材中之以才略著者

奏稿卷四十八

三

記名提督西林巴圖魯李良穆戰陣勇敢紀律嚴明遇事有條理性情廉慎安重深穩蓋將材中之以器局著者

記名提督斐凌阿巴圖魯前福建臺灣鎮總兵劉明燈治軍廉明見事敏速於地勢賊情均能留意遇事能持大體處置咸宜蓋將材中之以識略著者

記名提督哈西巴巴圖魯雲騎尉世職徐占彪英勇出羣性情坦率戰必身先創痛徧體共事各將領無不歎服雖因人受累時所不免而質地實堪造就蓋將材中之以勇銳著者

軍機大臣奉

旨畱中欽此

軍機大臣字寄光緒二年二月初七日奉

上諭沈葆楨等奏籌議關外餉需礙難借用洋款暨江蘇擬力籌西征協餉各摺片據稱借用洋款耗息甚多海關部庫均受其害應於各省關移緩就急并江蘇竭力籌措等語所陳亦屬實在情形西征餉事甚殷自當通盤籌畫於國計軍餉兩無妨礙方爲有濟左宗棠公忠素著自能計出萬全應如何斟酌盡善之處著該大臣體察情形妥爲籌畫迅速具奏原摺片著鈔給左宗棠閱看沈葆楨所請將湖北湖南協濟江防銀兩移解西征糧臺濟用俟左宗棠覆奏到日再行降旨將此由五百里各諭令知之欽此

附沈葆楨  
吳元炳摺片

奏爲遵

旨籌議出關餉需礙難借用洋款敬摭管見恭摺瀝陳仰祈  
聖鑒事竊臣等承准軍機大臣字寄光緒二年正月初七日  
奉

上諭左宗棠因出關餉需緊迫擬借洋款一千萬兩事非得  
已若不准如所請誠恐該大臣無所措手於西陲大局殊有  
關繫著沈葆楨卽照左宗棠所奏妥速籌議奏明辦理等因  
欽此仰見

朝廷軫念西陲救民水火之至意查左宗棠原奏瀝陳餉源

奏稿卷四十八

重

枯竭萬不得已而議借洋款在該督臣勞心焦思獨措危局  
撫士卒於飢疲創病之餘籌餽運於雪海冰天之界仔肩艱  
鉅冠絕一時臣等忝任封圻誼均休戚如果於事有濟曷敢  
稍存推諉況上海爲洋商精華薈萃之地關道所屬多洞悉  
洋情之員以利招之一呼百諾江南自兵燹後宜修舉廢墜  
刻不容緩者殊多特以度支匱於轉輸馴致遷延歲月關隴  
暫有鉅款支拄協濟稍鬆江南及是時爲自顧之計亦誠甚  
便而臣等夙夜不寐反覆再四竊慮此舉有病於

國關係綦大卽西陲軍事稍紓目前之急更貽日後之憂不  
敢不將實在情形爲

皇太后

皇上縷晰陳之伏維國債之說徧行於西洋而西洋各國受利受病相去懸絕則以舉債之故不同而所舉之債亦不同也夫開礦造路挖河巨費也而西洋各國不惜稱貸以應之者蓋剋期集事課稅出焉本息之外當有奇贏所謂以輕利博重利故英美等國有國債而不失爲富强若以國用難支姑爲騰挪之計後此息無所出且將借本銀以還息銀歲額所入盡付漏卮目下如西班牙土耳其皆將以債傾國日本亦駸駸乎蹈其覆轍矣此舉債之故之不同也英美舉債於本國之商國雖病而富藏於民有急尙可同患若西班牙等

奏稿卷四十八

五

國輸息於鄰封一去不能復返此所舉之債之不同也昔歲臺灣之役本省羅掘一空外省無絲毫可以協濟急何能擇出此下策然以新疆較之局面之廣狹事體之難易相懸奚啻霄壤臺地東西二三百里南北千有餘里日本貿貿然身入絕地雖有必死之志而無可久之資堅與相持情見勢屈倘照原議借款六百萬則善後之事以次備舉煤礦茶山所出漸足餽軍一借斷無須再借嗣因借過二百萬倭事業已定局部議飭令停止臣葆楨卽不敢再申前議新疆廣袤數萬里戈壁參半回部皆其土著根深蒂固旣無盡勦之理又無乞撫之情似非一二年間所能就緒卽使事機至順逆回

弭首諸城盡復與俄爲鄰互市設防正重煩

朝廷擘畫而非放牛歸馬之時也洋人肯以鉅款借我者恃有海關坐扣如取如攜也洋人取之海關海關仍待濟於各省向日各省僅籌協餉已催解不前今令兼籌協餉之息能如期以應乎協餉愆期而海關病海關無可彌補不得不虧解部之款而部庫病雖日取各省督撫藩司而効之餉項祇有此數此盈則彼絀朝取則暮涸坐待嚴譴而無可如何前屆左宗棠借洋款三百萬計息蓋七十萬若以此七十萬供西征之餉未必不少有裨補今以一千萬照臺灣成案八釐起息十年清還計之耗息約近六百萬兩不幾虛擲一年之

奏稿卷四十八

五

餉乎若照數乘除則西征僅得四百餘萬實餉耳前屆之三百萬至光緒四年始清而續借之一千萬今年卽須起息明年卽須還本海關應接不暇而西陲之士飽馬騰不及兩年涸可立待進兵愈遠轉運愈難需餉亦愈鉅將半途而廢乎勢必不可將責各省於還債之外另籌接濟乎勢又不能將再借洋款乎海關更無坐扣之資呼亦不應徒令中興元老困於絕域事豈忍言者此臣等所以反覆再四而不敢爲孤注之一擲者也夫以出關之事之急左宗棠籌借洋款本有成案不遽委員徑向洋人定議而謀之於臣葆楨

諭旨又敕臣葆楨妥速籌議奏明辦理則萬難盡善之處已

在

聖明洞鑒與二三老成燭照數計之中如臣等博不分畛域之名罔顧事後之無可收束於心竊有所未安然謂西征可停則臣等又斷斷以爲不可何者我退則敵進關隴且因而不靖徒棄

祖宗辛苦艱難締造之地而列戍防秋勞費亦復相等顧臣等竊以爲左宗棠此行不當效霍去病之埽穴犁庭而當師趙充國之養威負重將帥無赫赫之功而

國家受萬全之福誠能扼其衝要堅壁清野開水利廣屯田考畜牧關外多一分之產關內卽省一分之運反客爲主脅

奏稿卷四十八

美

從者稽首歸命渠魁亦束手就縛較之糜血肉於堅城之下求萬有一然之勝其得失豈可同日語耶夫甘餉之鉅困於餽運耳餽運省則一年之餉可支兩年目前不能不飭各省勉力籌濟臣請

朝廷發曠代之

德音以內庫爲之倡

皇太后

皇上躬行節儉度越尋常豈復有不急之需可以議裁議減者然其數不在多但得

明詔數言足以激將士敵愾之心而生疆吏同仇之感左宗

棠原奏深言甘餉爲海防所佔惟江西浙江兩省尙能力顧大局查海防專款奉撥瞬將經年臣葆楨恐分之則爲數愈微咨請各省儘解北洋冀可藉資集事而去歲所報解者亦僅江西十萬浙江十萬他省涓滴俱無可見各省非有所偏倚於其間限於力耳此時各省未必尙有畱存鉅款以待添撥各省原撥陝甘之款有解不及半者雖添撥亦徒擁虛名懇

敕下部臣熟權緩急將有著之款移稍緩者於最急之區庶幾各省關可以勉強從事如江蘇協甘之款內有每月一萬歸陝西撫臣收放竊計陝西肅清多年本省防軍不難自籌

奏稿卷四十八

七

一萬此款似應歸之西征江西派協雲貴之兵餉勇餉爲數頗鉅夫雲貴未嘗不急然較之西征則緩矣凡類此者似宜由部臣通盤比較酌量勻撥至遣使之舉已有成議然數道并出則所費不資應請除已奉

諭旨者准行外其餘且作緩圖俾部庫得以周轉軍興以來各路軍營亦殊難得滿餉如果部撥之款能解至八成以上以左宗棠之恩義拊循之大局必不至決裂臣等鰓鰓過慮何當機宜竊欲以責難之忱上籲

君父而以共濟之念求諒大臣除將兩江協甘餉項彙核數目另行附片陳奏外所有遵

旨籌議出關餉需礙難借用洋款緣由恭摺由驛五百里馳  
陳伏乞

皇太后

皇上聖鑒訓示不勝戰慄屏營之至

再查江蘇協濟西征餉銀計三大宗一從同治七年正月起  
以二萬兩解左宗棠軍營以一萬兩解穆圖善軍營每月共  
三萬兩一爲隨左宗棠西征之老湘營每月四萬五千兩一  
爲陝西撫臣軍營每月一萬兩此原協餉項之大致也同治  
八年正月部議每月續撥三萬兩經前督臣認解一萬兩由  
湖南督銷局按月籌撥此外如豫師榮全金順等軍名目孔

奏稿卷四十八

三

多要無非江蘇協甘之餉雖未能均符部撥原數然計同治  
七年以至今日實解過協甘餉銀千有餘萬兩江南民力竭  
矣臣等竊以爲名目太多協濟者苦於應接不暇只得均置  
度外以避偏厚之疑主持軍政之人又無從通籌緩急以爲  
操縱或安坐者有可私之餉而前敵者轉無隔宿之糧應請  
除穆圖善一軍已改撥吉林另歸東三省協餉籌解外自本  
年正月爲始恪遵此次所奉

諭旨江蘇月協銀八萬兩由臣等督飭司關局力籌如數內  
劃出左宗棠還洋款數目發交江海關其餘儘解左宗棠後  
路糧臺所有老湘營及關內外各軍均由左宗棠酌量統收

分撥以清眉目而一事權至年終一月滿餉五萬兩臣等俟  
交冬令仍極力籌解不入月餉之數此外蘇省更無畱餘可  
以添撥之款以後如有添撥甘餉應懇

敕部指一而來力能籌解之款割數互抵庶幾不致遷就挪  
移轉虧原撥之數惟出關待用孔亟蘇省撥款截還洋債而  
外按月到甘者甚苦臣等謹將江防應購之西洋礮械  
姑從緩辦請

旨敕下湖北督撫臣將協濟江防未解之十二萬兩湖南撫  
臣將協濟江防未解之八萬兩移解左宗棠後路糧臺以赴  
西征之急勿誤戎機是否有當伏乞

聖鑒訓示

奏稿卷四十八

五

請添設平遠海城兩縣學額摺

光緒二年二月十五日會銜

奏爲籲懇

天恩添設平遠海城兩縣學額以廣教化恭摺仰祈

聖鑒事竊維甘肅新設之平遠改設之海城兩縣應設學額前准部議固原州學額向係十五名鹽茶廳無學額附固原州籠統取進今既將固原鹽茶所轄之地分撥平遠海城二縣是該州學額亦應分撥不得仍照原額十五名之數至平遠海城二縣係由鹽茶固原會甯靈州靖遠各廳州縣分出應設學額卽應由各廳州縣學額內分撥應將固原州學額十五名內撥出三名改爲十二名平遠海城二縣各定爲五名除固原州所撥三名外再於會甯

奏稿卷四十八

三

靈州及靖遠縣學額內共撥七名以符每縣五名之數行令查明各該州縣地方文風酌量抽撥奏明辦理其應否設立廩增額缺亦應酌量核辦等因查新設平遠改設海城二縣撥地之初原撥有靜甯隆德環縣會甯等處轄地迨查勘形勢仍嫌遼闊遂令撥還是此次平遠縣劃撥轄境僅就固原靈州二處分出海城縣轄境僅就固原靖遠二處分出并未分有靜隆環縣會甯等處轄地業經臣分晰陳奏其平遠海城兩縣應設學額各五名亦經臣於奏請添設化平學額摺內聲明俟陝甘學臣按試一周察悉各屬應試人數多少文風優劣會商具奏并咨會查照在案嗣學臣按試事畢接准咨覆按照部議取進固原直隸州歲科各十二名平

遠海城二縣歲科各五名惟平遠海城所分地段大半係固原鹽茶舊轄之地靈州靖遠撥地無多靜隆會甯等處分出轄地業已劃還自未便抽撥學額固原今既改升直隸州察看文風又較他處爲優而學額已遵部議撥出三名減爲十二名自未便再議抽撥致阻士人上進之心靈州學額向有十四名今撥入甯靈廳三名另片陳明外再撥平遠縣一名其靖遠分撥轄地較少察看文風亦遠勝於靈州應毋庸抽撥綜計平遠海城兩縣應設學額各五名除由固原州撥出三名靈州撥出一名外尙少六名無從抽撥應請

特加六名合之固原所撥三名靈州所撥一名以符部議平遠海

奏稿卷四十八

三

城兩縣各設學額五名之數其廩增額缺應於平遠海城兩縣各設廩生十名增生十名俟此次請設學額定案後再飭查照辦理行據布政使崇保按察使楊重雅會議悉與學臣吳大澂所咨相合詳請具奏前來臣覆核無異合無仰懇

天恩俯念邊省新設縣學各屬學額不敷抽撥

特准加額六名以廣教化謹會同陝甘學政臣吳大澂合詞恭摺具奏伏乞

皇太后

皇上聖鑒訓示施行謹 奏

會報抵蘭出塞日期摺

光緒二年二月二十一日  
會幫辦陝甘軍務劉典銜

奏爲會報抵蘭出塞日期恭摺仰祈

聖鑒事竊臣宗棠於上年十二月十四日附奏擬俟臣劉典到蘭將畱防善後諸務面爲商定卽啟行而西臣劉典於十一月二十日由湘啟行沿途風水阻滯樊城登陸入秦度隴雨雪載途感受寒疾仍按程行走二月初八日抵蘭連日商摧軍事及善後未盡事宜均有端緒正值河冰欲泮橋難遽架遲至二十一日臣宗棠始克率親兵十哨白馬氏練丁一營馬隊四起登程前進所部前隊二十四營則已於正月二十八二月初二初八十五等日陸續由涼州拔行令至肅州取齊分起次第繼進大約由肅州以西按

奏稿卷四十八

三

臺站行走中途無須停頓由巴里坤達古城十一站應察看地形畱駐數營防賊旁竄抵古城後須軍糧取齊乃可趨戰臣宗棠所帶親兵馬步各營暫駐肅州俟前路糧料運至古城後路肅州安西哈密各有儲積乃可前進其前路進止機宜已面授總理行營營務處西甯道劉錦棠令其相機辦理不爲遙制俄糧之運古城者截至四月可得四百八十餘萬斤僅敷金順全軍馬步之需繼進之軍所需糧料除官私馱騾隻裝運軍士自行裹帶外餘均取給哈密巴里坤哈密巴里坤糧源自甘州肅州安西而來巴里坤糧源自歸化包頭甯夏而來遠者五千餘里近者三千數百里截至四月巴里坤存糧可六百餘萬斤安西哈密之糧運至古城

者可四百餘萬斤存儲待運者尚千萬斤然勞費已不勝計矣其  
巴里坤有數徑可達安西不復經由哈密已飭記名提督徐占彪  
俟臣宗棠到肅後帶所部馬步四營駐之哈密則有張曜一軍馬  
步十二營宋慶所留步隊八百人擇要扼守以防吐魯番東犯之  
賊如此庶後路常通糧運不匱乃可言勁氣直達也臣等連日籌  
商關內外全局布置大概意見脗合彼此互相勛勉冀毋負  
聖明委任之意征防各軍和輯如常士氣甚奮尙堪仰慰  
慈懷謹合詞一併陳明伏乞

皇太后

皇上聖鑒訓示謹 奏

奏稿卷四十八

三

軍機大臣奉

旨另有旨欽此

新疆賊勢大概片

光緒二年二月二十一日

再烏魯木齊踞逆本地土回居多逆首白彥虎所帶陝回及甘肅從逆之回踞紅廟子古牧地瑪納斯等處而皆與南路踞逆回酋帕夏通帕夏卽敖罕部安集延回酋和碩伯克也帕夏當卽伯克轉音俄羅斯旣滅敖罕踞其塔什干都城敖罕所部安集延獨免同治四年乘回部之變入踞南路喀什噶爾及各回城於是吐魯番闢展以西土回皆附之帕夏能以詐力制其眾又從印度多購西洋槍礮勢益猖獗陝甘竄踞之逆及本地土回均倚之爲重然不敢顯然與俄羅斯較是俄兵之強可知俄人頗言其狡悍異於諸賊以敖罕向未用西洋槍礮安集延多洋槍隊而帕夏又能用

奏稿卷四十八

書

其眾是安集延之強亦可知官軍出塞自宜先剿北路烏魯木齊各處之賊而後加兵南路當北路進兵時安集延或悉其醜類與陝甘竄逆及土回合勢死抗官軍當有數大惡仗如天之福事機順利白逆殲除安集延之悍賊亦多就戮由此而下兵南路其勢較易是致力於北而收功於南也若北路軍威未至而賊先圖自固不敢互相援應但作守局以老我師則曠日持久亦在意中外間議論頗謂軍臨前敵陝甘竄回必有倒戈之事臣不敢信其誠然卽令誠然白逆必遁入南路安集延未經重創其狡焉思逞之志不忘如其併力穩抗自可獎率師徒爲一了百了之計倘詭詞乞撫仍思踞我腴疆或兵至則逃妄擬乘閒竊逞爲死灰復燃之

計則新疆隱患方殷豈可不預爲之所議者但以陝甘竄回及新疆各城爲慮不復知有安集延竄踞南路之事或以爲易或以爲難或以爲事可緩圖或以爲功可速就或主撤兵節餉之議或并爲難得易失之談辯說紛紜橫議歧出揆其命意皆因裨益洋防起見豈真由衷之談哉臣本一介書生辱蒙

兩朝殊恩高位顯爵出自

逾格鴻慈久爲生平夢想所不到豈思立功邊域覬望

恩施況臣年已六十有五正苦日暮途長乃不自忖量妄引邊荒艱鉅爲己任雖至愚極陋亦不出此而事顧有萬不容己者烏魯木齊各城不克無總要之處可以安兵烏魯木齊各城縱克重兵鉅餉費將安出康熙雍正

奏稿卷四十八

五

兩朝爲之旰食者準部也乾隆中準部旣克續平回部始於各城分設軍府然後九邊靖謐者百數十年是則拓邊境腴疆以養兵之成效也今雖時易世殊不必盡遵舊制而伊犁爲俄人所踞喀什噶爾各城爲安集延所踞事平後應如何布置尙費綢繆若此時即便置之不問似後患環生不免日蹙百里之慮區區愚忱竊有不敢不盡者謹將新疆賊勢大概一併附陳伏乞

聖鑒訓示謹 奏

軍機大臣奉

旨另有旨欽此

覆陳借用洋款并催解協餉摺

光緒二年二月二十一日

奏爲遵

旨覆陳仰祈

聖鑒事竊臣於光緒二年二月十七日承准軍機大臣字寄二月初七日奉

上諭沈葆楨等奏籌議關外餉需礙難借用洋款暨江蘇擬力籌西征協餉各摺片據稱借用洋款耗息甚多海關部庫均受其害應於各省關移緩就急并江蘇竭力籌措等語所陳亦屬實在情形西征餉事甚殷自當通盤籌畫於國計軍餉兩無妨礙方爲有濟應如何斟酌盡善之處著左宗棠妥爲籌畫迅速具奏原摺片

奏稿卷四十八

美

著鈔給左宗棠閱看沈葆楨所請將湖北湖南協濟江防銀兩移解西征糧臺濟用俟左宗棠覆奏到日再行降旨欽此跪誦

諭旨并細閱原奏摺片具悉江蘇撫臣竭力籌措兩江督臣將兩湖協濟江防銀兩撥濟西征深維大局苦心微臣身值時艱一籌莫展徒煩遠省疆臣代紓籌策感愧奚如豈敢乞餘不足又顧之他益增歉仄顧事有萬不得已者不敢自安緘默謹就愚見爲

皇上陳之臣之奏借洋款原因各省關應協款項積欠成鉅陳陳相因馴至洋防議起照常年又減至一半以外頻催罔應計無復之萬不得已而有此請非不知借用洋款非正辦也沈葆楨與臣素相契洽其清強有執臣常自愧不如原奏義正詞嚴復舉兩湖

應解江防銀兩移撥西征亦實情理兩得然其代爲臣謀究不如臣之自爲謀也姑就其論國債一說詳之泰西各國經常用度原有定數其格外之費均由其國富商酌度承認自出資本經營由公司抽收課稅以裕國用如開鑛治水諸大工作原奏所謂輕利博重利者是也下非放債上非借債不得概以國債名之閒有由其官中授意興辦如英吉利開印度通緬達滇邊山路圖就近銷售鴉片則官主謀而商應募不在此例至各國用兵除報怨雪仇外均爲其國商賈爭利起見兵費例由紳士商民認定計期取償於官則爲國債非臣臆說也原奏英美有國債不失爲富強西班牙土耳其以債傾國日本蹈其覆轍而謂英美舉債於本國猶是

奏稿卷四十八

七

富藏於民非西班牙等國輸息鄰封之比是矣至論各國舉債攸殊效有同異之分尙非探原之論夫英美富強甲於海國由來已久兵費借其本國之債不待求助鄰封自然之理西班牙不善經營土耳其耽吸鴉片日本因欲去其大將軍之偏舉國以奉西人割地以給俄人出其額征爲質各國衰亡之徵由其自致若謂借本國之債者必富且強借鄰封之債者自貽困蹙而引之爲借用各國洋款之戒非定論也就日本借用洋款而言因其國有逞志朝鮮取償國債之心洋人遂以此蠱之陰爲各國外海總埠頭之計日本未嘗不知祗緣旣與定議不敢復有異同隱忍遷就勉而出此非所論於西征一局夫西征用兵以復舊疆爲義非有爭奪

之心借千萬鉅款濟目前急需可免懸軍待餉十年計息所耗雖多而借本於前得以迅赴戎機事之應辦者可以速辦如減撤防軍以省糜費籌設新制以濬利源隨時隨處加意收束計十年中所耗之息可取償十年之中非日本之尋釁舉兵與洋人共利可比至西班牙舉債經商本奸商騙賴之類也土耳其舉債傾國本欸袴敗家之類也烏可同年而語哉以海疆按年應協之餉了還按年應還陝甘借款本息不必得半而已足是大有造於塞防而無所損於洋防原奏謂洋款取償於海關海關仍待濟於各省各省僅籌協餉已催解不前令兼籌協餉之息何能如期以應查借用洋款向章海關出票定數督撫鈐印歸款此次辦法自亦如此

奏稿卷四十八

奏

各省關印票之數原劃定各省關應協之款并非於協餉外兼籌協餉之息事理著明非可隱佔其與解部之款本不相涉原奏所稱海關病部庫病者其源在各省協餉之愆期見奉

諭旨自光緒二年起如不能照原撥添撥數目解至八成以上即將該藩司監督照貽誤京餉例由該部指名嚴參此後海關自可不至代人受過平心而言借用洋款實於中國有益無損泰西各國興廢存亡并非因借債與不借債之故其理易明即以見在局勢言之臣非先後借用洋款則此軍不能延至今日上年李鴻章有二千萬待借之奏卽沈葆楨辦理臺防亦會借用洋款六百萬兩嗣因倭事速定部議停止四百萬今倭患息而西事殷重理舊

說似非不可應請

旨敕下兩江督臣卽代臣借洋款四百萬兩迅解來甘臣得此款清還新借陝鄂上海各款一百二十萬兩尙可餘二百數十萬兩暫資敷衍如各省關自本年正月起協款能解足八成以上臣軍有的餉源源而來苟可設法騰挪何肯以催餉頻煩自取憎厭倘各省關未能如數報解微臣計無復之洋款旣不能借則非息借華商鉅款不可而息借華商鉅款若不謀之兩江則又無從著想此臣之苦衷所不得不預爲陳明者也江蘇協款每年除劃抵前借洋款本息外僅應補解二十餘萬兩蘇省雖允竭力籌措爲數非多而協款外尙有應解老湘營每月四萬五千兩一款甫解至

奏稿卷四十八

无

上年七月計截至今正已欠解六箇月沈葆楨雖將湖北欠解江防之十二萬兩湖南欠解江防之八萬兩撥解西征然以之抵老湘營月餉截至今正尙欠七萬兩原奏穆圖善月餉一萬兩關內外各軍均由臣酌量統收分撥意在清眉目一事權亦俾臣得稍資周轉耳然自統收分解之議起臣軍之餉正因墊解過多大受其累屢經奏明有案何能稍資周轉乎總計沿海各省關協甘之款山東爲數少而報解勤浙江則更不遺餘力其欠解之最多者閩爲最粵次之粵東自瑞麟故後閩自英桂內召後解款日漸減少閩之積欠則已至三百餘萬矣合無仰懇

天恩敕下兩廣督臣廣東撫臣福建督撫臣盡力籌維務將本年

應協甘款如數迅解共支危局母准以八成自限則猶隴餉之一  
大宗也臣拜摺卽行馬步共二十九營每營僅攜四箇月鹽菜馬  
乾就道幸各處糧料水草均已預備師行無阻當各營啟行臣適  
奉

諭旨准借洋款士氣甚奮閱沈葆楨原奏則未敢宣布也謹一併  
覆陳伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷四十八

罕

軍機大臣字寄光緒二年三月初一日奉

上諭左宗棠劉典奏會報抵蘭出塞日期左宗棠奏新疆賊勢大概情形請籌借洋款四百萬兩丁日昌奏洋債不宜多借各摺片覽奏均悉劉典見已馳抵蘭州所有關內關外各事宜左宗棠業已統籌全局布置妥協督率馬步各營分起西進爲規復新疆各城之計足見公忠體國力任其艱該督抵肅州後應如何次第進兵之處均著隨時相機籌辦朝廷不爲遙制所陳新疆賊勢軍情瞭如指掌惟期節節掃盪收復烏魯木齊吐魯番以次廓清南北兩路奠定西陲爲一勞永逸之舉後路催運糧餉軍火關繫緊要劉典當隨時籌畫以資接濟左宗棠出師塞外必須士飽馬騰方

奏稿卷四十八

聖

足以壯軍威而張撻伐各營將士踴躍前驅尤深塵念各省協解西征餉銀未能足數致有積欠口糧此次遠道進兵糧餉必須充裕左宗棠前議借洋款一千萬兩以備應用因耗息過多見請減借用四百萬兩係爲節省經費顧全大局起見惟見當大舉深入酌發欠餉預備行糧需款甚鉅恐不足以資周轉該督旣以肅清西路自任何惜籌備鉅款俾敷應用以竟全功加恩著於戶部庫存四成洋稅項下撥給銀二百萬兩并准其借用洋款五百萬兩各省應解西征協餉提前撥解三百萬兩以足一千萬兩之數該督得此鉅款務將新疆軍務早日戡事迅奏膚公國家經費有常似此竭力湊撥可一而不可再萬不可虛糜帑項日久無功洋款

如何籌借著左宗棠自行酌度奏明辦理撥用四成洋稅二百萬兩如何解還部庫著戶部籌撥歸款所借洋款著仍遵前旨在各省應協西征新餉內分年撥還各省應解西征協餉見令提前趕解三百萬兩并著戶部酌量指提毋任延宕其餘應解西征協餉仍著各該將軍督撫遵前旨嚴飭各該藩司監督儘力報解毋得以八成自限左宗棠奏閩粵欠解較多請敕將本年應協甘款如數迅解等語著該督撫遵照辦理籌借洋款本係萬不得已之舉因西征大局所關是以允借五百萬兩俾利軍行丁日昌所陳變通西餉辦法亦有所見并先行湊齊六十萬兩匯由沈葆楨處彙解具見急公嗣後應解左宗棠協餉仍著會商文煜李鶴年源源籌辦以應急需將此由六百里諭知左宗棠劉典文煜沈葆楨李鶴年劉坤一翁同龢吳元炳裕祿劉秉璋楊昌濬丁日昌丁寶楨鮑源深李慶翱譚鍾麟王文韶張兆棟并傳諭文格李文敏知之欽此

刊用木質關防一切案件分別辦理片

光緒二年二月二十一日會幫辦陝甘軍務劉典銜

再臣典抵蘭後旋經臣宗棠刊刻

欽命幫辦陝甘軍務候補三品京堂二品頂帶雲騎尉世職阿爾剛阿巴圖魯木質關防一顆咨送臣典啟用至臣宗棠出省後所有總督衙門一切例案已委布政使崇保代拆代行其考拔武弁千總把總各缺向由提鎮揀選送蘭州考拔守備以上委署請補各缺向由督臣酌定茲臣宗棠督師出塞相距日遠所有武職委署請補及拔補弁缺均商由臣典就近辦理以免稽延而示體恤至雨澤糧價例由藩司核明詳報督臣按月具奏茲臣宗棠遠出若循例辦理必致愆期是以商之臣典凡循例月摺及關內軍務糧餉一切事宜均由臣典核定借用藩司印信隨時會銜專摺具奏惟文職委署請補員缺則由藩臬兩司詳報行營由臣宗棠辦理師行愈遠轉饋愈艱餉糧極關緊要而烏魯木齊以東皆陝甘總督所轄所有陝甘總督關防應由臣宗棠隨帶西征者一期呼應靈通一期軍餉與糧事權歸一便於騰挪周轉也謹一併附片陳明伏乞

聖鑒謹 奏

軍機大臣奉

旨知道了欽此

道員王加敏懇

予獎敘片

光緒二年二月二十一日

再臣於同治十年彙案保獎蕩平金積堡賊巢甯靈肅清臺局出力各員內二品頂帶湖南補用道王加敏附片奏請

賞給從一品封典奉

旨允准嗣經部議核與章程不符行令另行奏請前來臣維王加敏於咸豐年間以湖南候補道員辦理本省糧臺後經臣奏調赴浙督辦臺務同治五年臣奉

命西征復令駐鄂總理陝甘後路糧臺事無巨細均必躬親歷無貽誤不特臣軍倚賴最深亦爲各省大吏所共信與臣共事先後二十餘年深悉其樸幹廉勤才品兼擅實一時之選而歷次保案

奏稿卷四十八

四

從未籲請

優獎雖雅知該員宦情素淡不以榮進爲懷亦正以後路臺務緊要一時難覓替人勉事羈畱得資臂助此次關隴肅清應加甄敘合之前此金積保案部議另行奏請應一併籲懇

天恩俯准將二品頂帶湖南補用道王加敏交軍機處存記遇有湖北道員缺出請

旨簡放俾臣軍餉需要務藉資料理而鄂省得一能事監司亦有裨益是否如斯謹附片具陳伏乞

聖鑒訓示謹 奏

軍機大臣奉

旨王加敏著加恩賞給從一品封典該部知道欽此

奏稿卷四十八

呈

軍機大臣字寄光緒二年三月初九日奉

上諭戶部奏遵議提撥出關餉需一摺左宗棠出關餉需業於部庫四成洋稅項下撥給銀二百萬兩并准借用洋款五百萬兩各省應解西征協餉提前撥解銀三百萬兩以足一千萬兩之數諒敷應用沈葆楨等前請將江西派協雲貴各餉及湖南湖北未解江防銀兩撥歸西征均可毋庸置議江蘇每月應協左宗棠餉五萬兩外尚有月協陝西銀一萬兩由左宗棠統收分濟見在陝西軍務已靖此項能否撥歸西征著左宗棠體察情形會商譚鍾麟奏明辦理至老湘營豫師金順榮全各軍餉據戶部奏稱或應由蘇省解交該營或應由蘇省解還部庫均與西征軍餉無涉卽著

奏稿卷四十八

吳

沈葆楨吳元炳仍飭各歸各款照舊撥解毋庸由左宗棠統收分撥以免轉轄惟老湘營餉項江蘇原定每月協撥六萬兩沈葆楨等前奏每月係四萬五千兩因何遞減著該督等查明報部查覈各省提前趕解西征協餉三百萬兩見據戶部奏稱福建已奏報提前湊解六十萬兩廣東省本年應協甘餉計九十一萬兩已催令如數迅解內除應還上屆洋款本息約共四十萬兩零仍餘銀五十萬兩閩粵共計已得銀一百十萬兩其餘一百九十萬兩卽照部議浙江提銀四十五萬兩江西提銀三十萬兩河南提銀五萬兩湖北提銀三十八萬兩湖南提銀六萬兩山東提銀六萬兩山西提銀二十萬兩安徽提銀十萬兩四川提銀二十萬兩閩海

關提銀十萬兩共湊足三百萬兩均於本年應解西征協餉項下先行提齊統限三箇月內埽數解交左宗棠應用各該將軍督撫務當遵照部提數目依限趕解不得稍有短欠致誤戎機福建每月應協四萬兩本年係有閏之年丁日昌報解之六十萬兩應照有閏之年覈計作爲本年至來年二月止月餉以免牽混部撥四成洋稅銀二百萬兩見議分作四批由順天府遴員接續領解交西征糧臺分收轉解左宗棠軍營此項庫款該部請於西征協餉內儘數解還各直省應解西征協餉除提前之三百萬兩及兩次所借洋款劃還本利各銀若干外所餘本屬不多若令儘數解還部庫恐於該大臣軍營餉需仍屬不敷周轉著改於去歲議撥南

奏稿卷四十八

七

北洋海防經費之四成洋稅內按年酌提一半將此次部撥二百萬兩陸續扣還卽著李鴻章沈葆楨遵照辦理所借洋款著左宗棠詳細覈定各省協餉內某年某省應還借款若干分晰具奏各該將軍督撫卽將該省協餉解過西征糧臺及歸還借款本利銀兩各數目隨時咨報戶部查覈倘不能解至八成以上仍著該部嚴參懲辦將此諭知戶部并由五百里諭知左宗棠李鴻章文煜沈葆楨李鶴年劉坤一翁同龢吳元炳裕祿劉秉璋楊昌濬丁日昌丁寶楨鮑源深李慶翱譚鍾麟王文韶張兆棟并傳諭文格李文敏知之欽此

馳抵肅州各軍分起出關摺

光緒二年四月十三日

奏爲微臣馳抵肅州資遣馬步各軍分起出關恭摺馳報仰祈

聖鑒事竊臣於二月二十一日由蘭州拜摺啟行沿途整隊前進

三月十三日駐軍肅州總理行營營務三品卿銜二品頂帶法福靈阿巴圖魯劉錦棠先率馬步全軍駐於城北記名提督新授漢中鎮總兵譚上連領所部先進記名提督甯夏鎮總兵譚拔萃繼之記名提督陝安鎮總兵余虎恩又繼之四月初三日劉錦棠親率漢回馬步各軍禡旗啟行擬抵安西後分起以次前進蓋師過哈密行戈壁中糧糗可裹帶以趨柴薪草束可儲峙以待惟水泉缺乏雖多方疏濬不能供千人百騎一日之需非分起續進不可

奏稿卷四十八

哭

也見據譚上連稟已抵巴里坤譚拔萃已近哈密余虎恩已過安西臣因古城所收俄糧尙祇四批金順函牘頻來需糧甚急非得三百六十萬斤不能見新臣允於巴里坤取糧百萬斤哈密取糧二百六十萬斤以供軍食而古城所收俄糧四批亦概付之計新糧可資接續矣惟劉錦棠馬步二十五營所需軍食本指巴哈存糧轉運古城茲兩處已分濟金順雖餘糧尙多而一時運腳難期周轉缺乏堪虞除前雇商駝萬隻由安西哈密徑運古城外復由肅州儘官民商三項車輛裝糧料運古城以廣儲峙幸歸化包頭甯夏商駝之運巴里坤者踴躍如常存糧尙敷轉饋劉錦棠到哈密後計古城儲峙稍充卽率各營長驅大進直擣賊巢戰事當在

五月閏月之際屆時節近秋初新穀徧野有糧可因轉戰而前士氣自倍臣與劉錦棠熟商進兵機宜以先遲後速爲穩者此也幸蘭州涼甘各屬俱霽春霖肅州安西於三月二十一二等日同霑優渥農祥有兆豐稔可期如天之福關內外幸獲豐年則就近採運供支勞費亦可漸圖撙節而西征大局庶幾速振矣所有分起出關事宜謹據實陳明伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷四十八

完

額馮兩軍進攻瑪納斯城失利大概情形片

光緒二年四月十三日

再臣於本年三月二十五日在肅州行營准金順咨稱統領吉江馬隊涼州副都統額爾慶額咨報本年正月閒聞白逆有糾合瑪納斯南北兩城踞回竄擾糧運之事因與督帶定營馬隊總兵馮桂增會商振武營統領參將徐學功各率所部會師於大何廠相機進取瑪納斯城以期阨險防竄籌商既定額爾慶額與馮桂增卽於正月二十七日率隊先行徐學功繼之二十八日額馮兩營抵大何廠因待徐軍未至遂於是夜先進二十九日寅刻徑薄瑪納斯北城馮桂增等改騎爲步由城西北兩面猱登斃守城逆回二十餘名開門延納官軍城中踞賊驚起拒敵馮桂增率部巷戰額爾慶額麾軍繼進鏖戰踰時斃賊三百餘名并陣斃兇悍逆目翟老四嘎一兩名餘賊卻聚城東隅天色已明南城踞回見北城危急連施大礮官軍少卻南城賊馬步千餘乘勢蜂擁而至北城東隅聚賊復出死拒馮桂增縱橫馳突身負數創額爾慶額亦奮身抵敵背足受傷俱裹創力戰馮桂增復受傷墜馬賊眾猛撲昇擁入城額爾慶額憤極陷陣斃賊十餘名因弁勇傷亡已多勢不能支遂卽收隊回防徐學功於是日行距瑪納斯城十餘里地方見事已敗亦卽撤回額軍陣亡官兵共計五十五名馮桂增所部暫飭都司馮以和接帶整理又據徐學功報戰事失利略同惟所稱未進之先額爾慶額等與徐學功原議於正月二十九日由大

奏稿卷四十八

何廠會師進取議定後額爾馮兩軍先期進取徐軍屆期進發行距瑪納斯城十餘里地方遇兵勇紛退額爾慶額帶傷回防徐學功率所部前行救護敗殘兵勇收隊回營沿途探詢額軍官兵約陣亡三十餘員名馮軍弁勇約陣亡一百六七十名額爾慶額挑帶駐防沙灣土勇約陣亡十餘名金順以徐學功救援不力先摘其翎頂額爾慶額進志過銳亦未便免議等因咨臣核奏前來續接額爾慶額函牘深以徐學功進兵遲緩爲言并稱前報陣亡官兵五十五員名內有披甲金有一名已由賊中逃回實共陣亡五十四名其馮軍陣亡弁勇據營員稟報共計一百九十一名與徐學功所報兩軍陣亡人數亦有未符臣維龔攻堅城本難得手而馬

奏稿卷四十八

五

隊黑夜撲城尤爲希見之事額爾慶額馮桂增久歷行間不應冒昧至此此致挫之由實因輕進貪功咎由自取徐學功行近瑪納斯地方知前敵已敗不卽麾軍馳援雖屬無可辭咎惟據彼此牘報情形而言額爾慶額馮桂增原約二十九日進攻并未明定時刻嗣兩營於先夕寅刻麾馬隊前進自非徐學功所能預知且額爾慶額於襲攻瑪納斯賊巢事前并未咨商金順事後函牘遲至兩月始抵肅州不但馮桂增存亡未悉卽所部金有一名敗後逃回當時亦未及詳關外軍務文報多不足憑臣未敢輕率請

旨見飭總理行營營務道員劉錦棠逐細查明具覆再會金順據實馳報以昭核實謹先將大概情形附片陳明伏乞

聖鑒訓示謹 奏

軍機大臣奉

旨另有旨欽此

奏稿卷四十八

三

欽奉 恩諭擬緩借洋款招

光緒二年四月十三日

奏爲欽奉

恩諭准撥部存鉅款并蒙

敕催省關提前速解協款

允由微臣酌籌借用洋款敬陳感激下懷及擬緩借洋款情形恭摺馳陳仰祈

聖鑒事竊臣於三月十三日馳抵肅州後十六日准兵部遞到軍機大臣字寄光緒二年三月初一日奉

上諭左宗棠出師塞外必須士飽馬騰方足以壯軍威而張撻伐各營將士踴躍前驅尤深廛念各省協解西征餉銀未能足數致

奏稿卷四十八

聖

有積欠口糧此次遠道進兵糧餉必須充裕左宗棠前議借洋款一千萬兩因耗息過多見請減借四百萬兩係爲節省經費顧全大局起見惟見當大舉深入酌發欠餉豫備行糧需款甚鉅恐不足以資周轉加恩著於戶部庫存四成洋稅項下撥給銀二百萬兩并准其借用洋款五百萬兩各省應解西征協餉提前撥解三百萬兩以足一千萬兩之數洋款如何籌借著左宗棠自行酌度奏明辦理欽此三月二十五日欽奉

寄諭部撥四成洋稅銀二百萬兩見擬分作四批由順天府接續領解交西征糧臺分收轉解左宗棠軍營此項庫款該部請於西征協餉內儘數解還各直省應解西征協餉除提前之三百萬兩

及兩次所借洋款劃還本利各銀若干外所餘本屬不多若令儘數解還部庫恐於該大臣軍營餉需仍屬不敷周轉著改於去歲議撥南北洋海防經費之四成洋稅內按年酌提一半將此次部撥二百萬兩陸續扣還所借洋款著左宗棠詳細覈定各省協餉內某年某省應還借款若干分晰具奏各該將軍督撫卽將該省協餉解過西征糧臺及歸還借款本利銀兩各數目隨時咨報戶部查覈倘不能解至八成以上仍著該部嚴參懲辦欽此跪誦再四感激涕零不能自己伏維出塞之師實緣局勢所在不得不然迥非黷武窮兵侈言遠略可比

聖明洞矚邊方久遠情形

奏稿卷四十八

著

軫念征軍積年苦況

特發德音允撥部存鉅款更蒙

慈諭各營將士踴躍前驅尤深廕念而慮微臣減借洋款難資周轉

允借洋款五百萬兩

令其自行酌度辦理

慈懷之曲體邊關將卒無微不至如此何以復加又

慮部議各省提前協解三百萬兩外儘數解還庫款於臣軍餉需難資周轉

於洋防經費四成洋稅內按年扣還紓應協各省之力不强

以難贍邊遠受餉之軍不限以數

天恩高厚

聖慮精詳非但時局之幸臣軍之幸卽各省督撫海關諸臣亦無不感幸同深臣於欽奉

恩旨後次日大饗諸軍宣示

朝廷德意令諸將校傳諭士卒歡聲雷動僉稱誓當竭力圖報有口同聲臣詢諸統將從前發四箇月鹽菜馬乾銀兩尙餘若干則僅有存者比以俄糧遲到先挪此項糧價銀十二萬五千兩分給裹帶均欣然喜出望外譚拔萃余虎恩劉錦棠率各起馬步出關時臣於餞送後遣人覘之還報士馬飽騰整列齊行無落後者觀

奏稿卷四十八

壹

士氣之可用知

皇仁之入人者深臣之請借洋款也原因協餉積欠太鉅頻催罔應計無復之而舉債用兵本泰西各國之常不足爲異借本愈多則期限愈遠取息愈薄尤於時局相宜所以擬定千萬者計得此大宗見餉除撥還歷年本息外協款尙多贏餘庶壹意經營事之應辦者及時舉辦尙冀得所藉手以濬利源非僅恃此款爲一歲計也所以必商之兩江者上海爲中外商賈銀洋匯萃之所商借洋款恆必由之而見任督臣原有借定未用之款重理舊說息耗不至頓增茲旣窒礙不行復奉

諭准借五百萬兩自行酌度敢不切實圖維以期周妥竊計本年

應得的餉除部款二百萬兩協款提前三百萬兩外各省尚有應解八成以上餘銀以之清還陝鄂滬新借各款尙可存留四百數十萬兩計連閏十箇月內餉需得資周轉是本年不借洋款尙無不可惟此後各省關協款衰旺未可預知而懸軍深入道遠費繁若無實餉接濟不堪設想近接上海轉運局道員胡光墉等稟稱上年花旗普魯社兩國在海島開鑛獲銀甚旺若與商借可期有成臣答以見奉

恩諭西征餉事目前尙資接濟擬待來年再行議借如可由陝甘總督衙門出給印票無須借重兩江海關固爲簡捷苟必須海關出給印票則浙粵或容商量惟借款不許向英商議及卽滇案速

奏稿卷四十八

奏

結亦不復向其商借并須預爲說明彼此成借不更關白英人惟借少則期近息重恐未能如臺防十年八釐之輕耳臣之擬待來年始行議借者一則遲借一年可省一年息耗一則明年議借隔年始還一期兩次彼時臣前借之三百萬兩本息已悉數還清界限分明各省關協餉從後年撥還借款亦不至稍形迫促屆時臣當詳細指撥再候

敕部議覆施行至陝甘誼均一體甘餉苦絀情形撫臣久已深悉譚鍾麟欽奉

鴻旨垂詢江蘇月協陝西一萬兩能否撥歸西征卽飛函抵臣無遑陝省如何爲難必當先其所急臣已函復卽由撫臣會銜具奏

免致上煩

宸廑所有微臣感激下懷及籌辦情形縷細陳明伏乞

皇太后

皇上聖鑒訓示施行謹 奏

軍機大臣奉

旨另有旨欽此

奏稿卷四十八

五

軍機大臣字寄光緒二年四月二十六日奉

上諭左宗棠奏馳抵肅州資遣馬步各軍分起出關額爾慶額等軍輕進失利見擬緩借洋款各摺片覽奏均悉劉錦棠等軍見已分起前進據稱該員到哈密後計古城儲峙稍充卽率各營直擣賊巢見在士氣方新軍聲丕振左宗棠當會同金順督飭將士乘其銳氣鼓行而西於穩慎之中寓奮迅之意殄除巨逆用奏膚公朝廷實有厚望焉額爾慶額等襲攻瑪納斯城輕進失利馮桂增被賊擁入城中著左宗棠金順查明詳細情形據實具奏左宗棠以本年餉需尙資周轉見擬緩借洋款著該大臣隨時酌度辦理前據額勒和布托倫布等先後奏報逆匪竄擾沙札蓋等處見在大軍出關該逆鋌而走險窺伺北路自在意中烏科等城境內未有重兵空虛可慮倘被其竄擾則勢成燎原聚殲不易著該大臣等揀派勁旅於北路地方擇要扼紮以杜紛竄將此由六百里各諭令知之欽此

請 敕直隸等省迅解塔城索倫營餉片

光緒二年四月十三日

再臣於光緒二年三月十三日准署伊犁將軍榮全咨稱索倫一營於同治十年奏明暫移塔爾巴哈臺駐紮初設營制元氣未復各省應撥協餉積欠二年有餘實係困苦希祈源源撥解以蘇涸鮒前來臣查索倫營等眾因同治四五兩年伊犁各城相繼淪陷流離失所同治七年初經榮全奉

旨收集移至葦塘子屯紮同治十年又請移駐塔城核減營制每年俸餉錢糧需銀二萬八千兩遇閏加增銀二千二百兩經部議准於直隸山東山西河南四省月協新疆餉內劃撥歷經該署將軍奏明在案茲因各省月餉積欠兩年有餘新經收集之兵異常

奏稿卷四十八

堯

困苦榮全所奏自係實在情形極宜早籌接濟臣適督師出關又苦無從挹注相應請

旨敕下原協督撫臣轉飭藩司迅籌接濟出自

天恩謹附片具陳伏乞

聖鑒訓示施行謹 奏

軍機大臣奉

旨另有旨欽此同日承准知會本日貴督具奏請

敕催直隸等省迅解索倫營欠餉片已奉有寄信

諭旨令李鴻章等迅撥矣

徐占彪丁憂畱營片

光緒二年四月二十八日

再據分統蜀軍提督徐占彪稟親母徐李氏前由蜀來甘探視於本年三月二十二日在甘身故提督係屬親子例應丁憂請卽委員接統各營俾得扶柩回籍安葬守制前來臣維徐占彪關隴從戎戰績卓著同治十一年進攻肅州聞計丁父憂稟懇奔喪歸籍

經臣奏奉

諭旨准令畱營十二年肅城克復移防甘州布置妥畢稟請歸籍終制并省其母時

臣奉

命督辦新疆軍務復經慰畱擬備出關之選徐占彪之母聞其不能遽歸比營葬甫畢卽親赴甘州探視其子蓋母子不相見者十

奏稿卷四十八

卒

有餘年矣每撫其子創痕徧體輒爲流涕然猶以立功圖報善撫士卒不必顧家爲言茲在甘身故徐占彪悲泣陳詞請委員接統蜀軍俾得扶柩歸葬臣維出關諸軍業經奏派分起啟行師期伊邇未便遽易統將因以古人墨經從戎金革無避之義示之仍飭徐占彪率所部出關俟軍務稍定再由臣給咨回籍以遂孝思而符定制謹附片具陳伏乞

聖鑒訓示謹 奏

軍機大臣奉

旨知道了欽此

出關諸軍進至古城畱防要隘摺

光緒二年六月初三日

奏爲出關諸軍次第進至古城畱駐巴里坤并籌防哈密安玉要隘以遏奔竄而赴戎機恭摺仰祈

聖鑒事竊臣於四月十三日馳報資遣馬步各軍分起出關後疊據總理行營事務三品卿銜布政使銜法福靈阿巴圖魯西甯道劉錦棠稟報分統右軍記名提督新授漢中鎮總兵譚上連甫抵巴里坤諜報馬賊由布倫托海出紅柳峽僻徑繞過古城聞將折竄歸巢譚上連率所部急進比訶知賊騎二百餘已由南山竄向吐魯番西去譚上連率所部扼紮芟芟臺色畢口大石頭二箇泉等處以護運道自率兩營進駐古城劉錦棠飭繼進馬步各軍均

奏稿卷四十八

十一

就哈密取存糧分起短運踰天山以抵巴里坤再由巴里坤短運抵古城限閏五月底一併取齊候令進止自率輕騎赴濟木薩金順行營商定方略并赴前途察度地勢以便布置屯糧護運輓轡轉輓事宜訶知土回馬明等結壘之處爲古牧地迤西而南數十里爲烏魯木齊紅廟子官軍必先攻古牧地撤烏垣紅廟之藩籬乃可成擣穴犁巢之舉也濟木薩卽愷安城距古城九十里由此而西七十里爲三臺驛又西八十里爲滋泥泉又西九十里爲阜康縣城又七十里爲黑溝驛又數十里至古牧地再進卽可抵烏魯木齊矣濟木薩距賊尙遠不能扼賊之吭劉錦棠會師進剿必先據要地爲儲糧屯師之所然後左右伸縮可以有爲阜康雖抵

空城而地當賊衝從前馬賊之犯科布多聞卽由阜康駛出劉錦棠之注意於此一爲進攻古牧地一爲遏賊奔衝實非無見惟阜康駐軍亦僅能遮截逆賊出竄一路其西北瑪納斯出竄之路尤宜先事綢繆臣密飭劉錦棠於未進阜康之先與金順圖之見接劉錦棠稟閏五月初十日由巴里坤率所部數營進古城先赴濟木薩與金順會商一切卽馳赴三臺滋泥泉阜康一帶相度布置計旬日內外所部各軍可齊抵古城當調其分起銜接而進約立秋之前乃有戰事也劉錦棠所部分紮木壘河迤東護運各營擬調赴古城遺防各壘亟宜填紮臣已調記名提督徐占彪率所部五營前往徐占彪自請併歸劉錦棠就近調遣臣已允之計此時

奏稿卷四十八

奎

已抵巴里坤接替延紮其木壘河迤西一百三十餘里奇臺古城諸處則已咨商金順飭原防各營分段縮紮當可無虞其哈密布置原有廣東提督張曜所部十二營及宋慶畱哈勇丁八百名前以安西州有通巴古路徑張曜分營設防安西茲大軍前進巴古之間有徐占彪一軍填紮以時局言宜厚哈密通吐魯番大路之防而巴古通安玉之小路若在所緩而臣之駐肅僅親兵一營馬隊二百騎亦無可再撥者劉典與臣書慮肅軍之單不資分布而腹地漢回安謐分防各營尙有堪以應調者飭總兵徐萬福率所部兩營兩旂赴肅臣念督標兵丁久經訓練亦欲調其入營學戰以成其才除調隨營馬步弁兵外飭署中軍副將尙兆嘉精選弁

兵三百員名赴肅此月內外均可取齊擬俟到肅後酌增安玉防營俾張曜所部悉赴哈密以絕旁竄而備將來軍鋒之選此籌策布置大略也察看關內外征防諸軍和輯一心氣勢完固前敵軍糧長運短運均尙應手儲時亦裕尙堪仰慰宸懷謹據實馳陳伏乞

皇太后

皇上聖鑒訓示謹 奏

軍機大臣奉

旨另有旨欽此

奏稿卷四十八

奎

覆陳杜賊紛竄情形摺

光緒二年六月初三日

奏爲遵

旨覆陳見籌杜賊紛竄情形仰祈

聖鑒事竊臣前奉

諭旨據額勒和布托倫布先後奏報逆匪竄擾沙札蓋等處見在大軍出關該逆鋌而走險窺伺北路自在意中烏科等城境內未有重兵空虛可慮倘被其竄擾則勢成燎原聚殲不易著該大臣等揀派勁旅於北路地方擇要扼紮以杜紛竄欽此閏五月十一日欽奉

寄諭金順奏追剿北路竄匪情形并請敕烏科等城派兵扼紮要

奏稿卷四十八

奏

隘英廉奏回匪竄擾塔境派隊防剿暨俄人解運軍糧被匪搶擄各摺片覽奏均悉賊匪由布倫托海竄出紅柳峽地方經官軍跟蹤追剿賊由吐魯番仍回烏魯木齊金順見派兵駐紮木壘河三箇泉等處梭巡防剿但北路沙磧遼闊無險可扼防不勝防且東路爲大軍後路糧運所必經該逆雖已歸巢難保不乘閒窺伺金順仍當嚴飭派出各軍認真防探遇賊卽擊毋稍疏懈布倫托海迤西疊崙山地方竟有賊匪搶劫俄人糧石之事該處地勢以烏魯木湖烏梁海沙札蓋爲扼要之區金順擬將塔爾巴哈臺索倫等隊扼紮烏魯木湖科布多蒙古等隊扼紮布倫托海或烏梁海適中之地烏里雅蘇臺黑龍江等隊扼紮沙札蓋藉堵賊匪紛竄

著榮全額勒和布車林多爾濟杜嘎爾托倫布保英英廉酌度情形尙能分撥官兵前往扼紮未始非先事預防之計惟各城兵勇無多防剿均屬喫緊恐一時不敷分撥兼顧爲難前月左宗棠奏資遣馬步出關當因烏科等城兵力甚單恐逆匪被剿旁竄諭令該大臣等揀派勁旅於北路地方擇要扼紮見在烏魯木湖等處旣爲賊匪必竄之路卽著左宗棠金順妥爲籌商若各城無可分撥之兵該大臣仍當懷遵前旨卽派勁兵前往駐紮以杜紛竄等因欽此臣維制賊之要在審賊勢察賊情而合地形之遠近衝僻以通籌乃可策全功而免意外之變臣於關外西北地形未能懸揣不敢冒昧指陳上瀆

天聽惟前奉

奏稿卷四十八

奎

諭旨揀派勁旅於北路地方擇要扼紮比已恭錄行知金順劉錦棠熟察地勢妥爲布置務期周密仰慰

宸廑一面咨委烏魯木齊領隊大臣錫綸赴沙山一帶預籌截剿飭總兵桂錫楨都司馮以和所部併歸統帶咨金順派撥吉林黑龍江馬隊合成千騎歸錫綸統帶以資得力并飭劉錦棠挑派將領率步隊佐之見准金順咨稱調徐學功馬隊三營步隊一營歸錫綸調遣劉錦棠進阜康大隊取齊又適奉行知閏五月十一日欽奉

諭旨自必恪遵派撥是錫綸兵力不虞單薄也錫綸生長邊陲熟

習蒙部情形能通蒙文蒙語聞其爲人亦甚倜儻與金順榮全均稱相得近時俄糧續由沙山一帶運送一百餘萬斤卽係錫綸迎護茲令防勦竄匪更自攸宜竊維用兵宜布遠勢金順所陳請將塔爾巴哈臺索倫等隊扼烏魯木湖蒙古科布多等隊扼布倫托海或烏梁海適中之地烏里雅蘇臺黑龍江等隊扼沙札蓋原因賊騎颯忽特甚北路平沙廣漠防不勝防慮難一處聚旃故爲此節節邀截之計雖於烏科兵力單薄調隊維艱情形未遑計及而就事論事實有不容已者臣以賊情賊勢度之陝甘逆回被白彥虎迫脅出關者非盡屬其死黨不過因頻年未經重創相與安之白逆等復劫其各棄眷屬北竄遐荒似非陝甘各回所願至關外

奏稿卷四十八

奕

土回自戡定後馴服有年已成積弱之勢狡悍嗜亂者無多白逆縱糾其北竄亦必無應之者如大軍進徧環攻諭以勦撫兼施之意釋脅從而急渠魁解散必眾逆賊如從阜康境內竄出劉錦棠金順所部截之自有餘力如從瑪納斯竄出近則孔才各營稍遠則錫綸新統各營截之亦可不令其善脫而塔爾巴哈臺後路又阻其前英廉所部雖單榮全應挑撥勁旅歸其調遣或扼之烏魯木湖或就近擇要截擊皆可確操勝算惟備禦不虞古之善教烏科兩城舊爲邊城要地自古用兵西北從北路出兵無由南路者兵事未可久荒當此殘逆喘息僅存而使百密一疏亦非全策如慮兩城兵力單薄糧運維艱則

諭調精兵於科城烏城前路擇要扼防或卽由兩城領兵大員就近添調防兵嚴遏奔衝以資周防而固封守給以薪水口分俾其壹意布置務保無虞計北路兵事當可剋期告蒞需增防兵爲數非多所耗無幾而大局益臻穩慎矣伏懇

申諭榮全英廉額勒和布車林多爾濟杜嘎爾托倫布保英實力籌維共襄茲舉母因惜小費而忽遠猷則誠時局之幸也謹據實覆陳伏乞

皇太后

皇上聖鑒訓示施行謹 奏

軍機大臣奉

奏稿卷四十八

卷

旨另有旨欽此

軍機大臣字寄光緒二年六月十七日奉

上諭左宗棠奏布置出關各軍并覆陳杜賊紛竄情形金順奏特參副都統吉爾洪額不遵節制各摺覽奏均悉劉錦棠所部見擬進紮阜康爲進攻古牧地之計其瑪納斯一帶爲賊匪出竄之路尤宜先事豫防左宗棠已飭令該員前赴濟木薩與金順會商妥辦此外奇臺古城及哈密等處亦經分派隊伍扼要進紮并咨委錫綸帶隊赴沙山一帶截剿布置尙屬周妥劉錦棠率所部此時已行抵古城著左宗棠金順妥速會商飭令各軍相機進取次第收復各城以期早日蕺事惟大軍進剿該匪鋌而走險勢必四路分竄塔爾巴哈臺烏里雅蘇臺科布多等城兵力雖屬單薄亦應

奏稿卷四十八

奏

聯絡聲勢妥籌防剿著榮全額勒和布車林多爾濟杜嘎爾托倫布保英桂祥英廉各就見有兵力扼紮要隘遇有賊蹤竄近卽行實力兜剿毋稍疏虞副都統吉爾洪額因病請假該員所帶之隊經金順派令沙克都林札布前往接統乃吉爾洪額抗不交代輒將沙克都林札布禁錮室中并有令眾兵向沙克都林札布索取欠餉等情似此任性妄爲不遵軍律殊堪痛恨著左宗棠按照金順原奏各節認真查辦據實具奏其所統官兵卽著金順飭令迅速交出不准藉詞延宕一面先將該副都統看管聽候查辦金順原摺著鈔給左宗棠閱看將此由六百里各諭令知之欽此

北路糧運情形并委副都統喜勝督辦歸包局務片

光緒二年六月初六日

再北路採運總局設於歸化分局設於包頭經臣奏委升用知府陝西卽補同知前署綏德州知州陳瑞芝提督銜總兵蕭兆元試辦一年有餘已據稟報採運五百餘萬斤合之甯夏採運幾及七百餘萬斤陸續解巴里坤存儲近時大軍次第出關及金順借糧濟急均指此應之其甘州高臺肅州安西哈密採運存儲之糧積至二千數百萬斤不爲不多惟此路經過戈壁天山艱阻異常駝馱車輛向視爲畏途兵燹之餘人畜彫殘勉籌轉饋勞費萬狀而究於軍儲少所裨益故自來西北用兵無用關內之兵轉關內之糧者蓋地勢物力實足限之臣於上年試辦歸化包頭轉運意欲於北路別開新徑以裕軍儲實緣迫不得已事之克濟與否未可預知幸奉

奏稿卷四十八

堯

諭旨准其照辦而委員陳瑞芝蕭兆元等不憚勞苦竭力經營獲此鉅數非始願所及也近因南路糧多運絀而供劉錦棠徐占彪二十餘營糧料外尙須供金順所部分駐巴城數營之糧又需接濟金順全軍軍食不得已飭加雇駝驟車輛轉肅州安西存糧越哈密巴里坤徑抵古城蓋已費不勝計勞無以加矣而中途又時有車壞牲斃之患不能限期畢赴劉錦棠乃儘該軍所有騾駝車輛助運哈密存糧備該軍四五十日之需節節短運四起四卸乃可齊抵古城計閏五月底古局存糧可得七百餘萬斤尙祇抵歸

化包頭甯夏運巴之數耳而由肅州徑運古城每糧百斤腳價十五兩有奇安西徑運古城腳價十一兩有奇較之包頭歸化甯夏徑運巴里坤每百斤祇需腳價銀八兩有奇所費又將過半由是觀之則用兵西北宜採運西北之糧可斷而知也轉瞬新穀將登須籌採運臣之愚見必以甯夏包頭爲大宗惟陳瑞芝蕭兆元等竭力經營雖有成效而於蒙部情形未能盡悉非加委大員前往督同辦理或不免利見弊生稍致疏誤查西安協領都統銜記名副都統喜勝謹慎明幹熟習蒙部情形前經臣委辦前提督劉松山軍糧會著成效臣已咨商署西安將軍圖明額委赴歸化城督同陳瑞芝蕭兆元辦理據圖明額函稱喜勝已於閏五月初三日帶同領催格成阿等十員名由西安馳赴歸化臣併飭陳瑞芝蕭兆元仍照常經理以資助佐庶北路糧運可期推廣於大局有益謹據實附陳伏乞

聖鑒謹 奏

軍機大臣奉

旨知道了欽此

軍機大臣字寄光緒二年六月十六日奉

上諭金順奏官軍進逼瑪納斯城連獲勝仗并請敕部籌撥見餉暨請敕山西各省湊撥專餉烏魯木齊各城應分新疆月餉請敕嚴催該營糧價等銀請指撥專款各摺片覽奏均悉總兵孔才等軍進逼瑪納斯城接仗獲勝官軍見紮該城西北之十里墩憑險築壘設法進攻金順已飭駐紮沙山子之徐學功一軍就近相機策應左宗棠亦派錫綸督帶馬隊前往沙灣扼賊北竄布置尙屬周妥劉錦棠所統各隊計可陸續到齊兵力已厚著左宗棠金順飭令各軍穩慎進取迅將瑪納斯城攻拔俾壯聲威乘勝規取各城以期次第收復金順餉需支絀自屬實在情形刻下攻剿正當

奏稿卷四十八

三

緊要亟應妥籌接濟俾資飽騰金順請由部庫四成洋稅項下提撥見銀五十萬兩迅解來營卽以江海粵海江漢三關欠撥該都統營餉歸還部款并請由山西陝西山東河南四省每月各撥地丁銀四萬兩長蘆河東兩鹽務每月各撥鹽課銀二萬兩湊成二十萬兩之數作爲該都統軍營專餉按月解清各該省每月應撥別處款項卽由原撥金順協餉之江海江漢粵海三關并四川湖北等省分與轉撥亦係酌量緩急變通辦理著戶部妥爲籌議迅速具奏該軍協餉各省關積年欠解甚多何以頻催罔應據奏四川欠解銀一百三十八萬兩山西欠解銀一百三十四萬兩河南欠解銀四十三萬五千兩山東欠解銀三十二萬兩湖北欠解銀

七萬五千兩江海關欠解銀三十三萬兩粵海關欠解銀四十五萬兩江漢關欠解銀四十六萬兩著文格鮑源深李慶翱丁寶楨翁同爵沈葆楨吳元炳俊啟迅速籌措源源撥解以應急需毋得再有遲延致滋貽誤出關各軍暨新疆各城餉項前經諭令由西征糧臺酌量籌撥左宗棠仍當隨時妥籌兼顧免致停兵待餉稍涉疏虞新疆月餉每月應撥巴里坤滿綠兩營六千兩哈密一萬四千兩烏魯木齊一萬五千兩各省未聞報解該處俸餉等項需用甚殷應如何分別嚴催之處并著戶部妥爲籌議奏明辦理金順軍營糧價運脚屯工三項銀兩該都統請由部指撥切實專款准其作正開銷不與兵餉牽混著戶部一併妥議具奏將此由五

奏稿卷四十八

三

百里諭知左宗棠金順沈葆楨翁同爵文格吳元炳丁寶楨鮑源深李慶翱并傳諭俊啟知之欽此

會師攻拔古牧地堅巢克復烏魯木齊迪化州城大概情形摺光緒  
二年七月  
十八日

奏爲官軍會師進剿屢獲大捷攻拔古牧地堅巢克復烏魯木齊  
迪化州等城大概情形恭摺馳報仰祈

聖鑒事竊出塞諸軍次第進至古城畱駐巴里坤弁籌防各要隘  
情形臣已於六月初三日詳細陳明嗣據總理行營營務三品卿  
銜布政使銜西甯道劉錦棠稟報六月初一日率所部馬步各營  
進抵濟木薩與金順商定機宜同時西進沿途各要隘均派營守  
之初八日金順進駐阜康縣城劉錦棠進紮城東之九營街訶知  
逆首白彥虎已由紅廟子移踞古牧地糾合該處回酋併力迎敵

奏稿卷四十八

三

安集延亦遣賊目率黨助戰劉錦棠以賊中正收穫麥豆有糧可  
因雖後隊尙未到齊然師期不宜再緩察看阜康大路至黑溝驛  
七十里縣西一帶深林蔽目野潦縱橫二十里爲西樹兒頭子尙  
有廢渠堪引縣西之水以供汲飲由此五十里抵黑溝驛則盡戈  
壁無水泉中間惟甘泉堡一智井開濬僅供百人一日之需不能  
安營詢之土人知黑溝驛之上爲黃田水盈溝澮上流卽古牧地  
賊已於此築卡樹柵嚴密守護意在斷官軍汲道迫官軍由大道  
越戈壁五十里而來前阻堅城人馬渴乏可乘其敝也十九日劉  
錦棠調集馬步各營拔至阜康縣城西十里督飭勇丁開溝引水  
節節疏通引至二十里之西樹兒頭子就地築壘二十日派馬步

各隊排列甘泉堡故掘皆井示行大路以懈賊黃田之防騎賊來窺旋卽退去二十一夜三鼓劉錦棠潛師夜起會金順所部進襲黃田黎明行近黃田卡柵賊始驚覺騎賊紛出遙聞古牧地附近角聲四起劉錦棠與金順率所部先踞山岡金順飭所部由右路進劉錦棠飭陝安鎮總兵余虎恩總兵陶鼎金率馬隊進左路之左甯夏鎮總兵譚拔萃參將董福祥副將張俊率步隊繼之提督黃萬鵬率旌善馬隊進左路之右漢中鎮總兵譚上連提督蕭元亨戴宏勝譚慎典湯秀齋率步隊繼之提督譚和義唐國華率步隊擁護開花大礮知府羅長祐直隸州知州袁垚齡提督張春發副將湯仁和率步隊護輜重分布已定余虎恩黃萬鵬等先率馬

奏稿卷四十八

七

隊分馳下山賊騎向前迎敵官軍奮威猛擊賊且戰且走旋復合步賊來拒余虎恩等督馬隊張兩翼譚拔萃譚上連董福祥等率步隊由中路衝出鏖戰數合陣斃悍賊甚多余虎恩黃萬鵬等左右包抄而前賊遂大敗卡柵踞逆見官軍銳不可當輜重狂竄劉錦棠飭馬步各隊躡蹤緊追且追且殺徑抵古牧地踞逆有縮入城者有南向紅廟子奔竄者其右路之賊亦經金順所部擊敗劉錦棠見古牧地城大而堅未可猝拔收隊還駐黃田計是役斃賊極多生擒二十一名奪獲旂幟槍械數十件戰馬二十三匹劉錦棠所部陣亡弁勇十四員名受傷弁勇三十八員名此二十二日會師攻拔黃田堅卡追賊至古牧地獲勝之實在情形也據擒

賊供踞黃田卡柵者陝逆白彥虎之黨踞古牧地城之回酋馬明因白逆及安集延曾疑其與官軍通押回南路嚇頭目王治金中萬率土回堅守其與官軍接仗之黃衣騎賊則安集延及南路各纏回也二十三日劉錦棠派營分紮古牧地城正東及東北二十四日卯刻劉錦棠見有騎賊數千由紅廟子而來一面告知金順準備一面飭余虎恩黃鵬等率馬隊馳赴山前嚴陣以待飭步營爲策應又調步隊分兩路攻南關分兩路攻山壘一面昇開花大礮安城東南礮臺轟其山壘復移轟城關牆垛多圯劉錦棠卽令譚上連袁壺齡等分途進攻以親兵徑擣山壘之前以馬隊繞出後面斷賊入城之路各將弁勇丁鼓勇齊登遂奪其壘譚上連

奏稿卷四十八

七

等見山壘已得士氣愈奮皆冒槍礮斬關而入立將城關攻破賊奔城中斬擒甚眾劉錦棠卽派各營進據關壘援賊悉力衝撲數次均經馬隊攔截金順并派馬隊兜剿塵戰逾時殪斃黃衣賊首羣賊氣奪敗潰而南兩軍馬隊合追至卡子溝收隊是役除金順一軍殺賊不計外劉錦棠所部殺斃轟斃悍賊約五六百名生擒安集延逆賊二名南路和闐阿克蘇纏回各三名葉爾羌纏回四名土回無數奪健馬三十五匹洋礮膏油槍旂幟刀矛無算陣亡弁勇二十九員名受傷弁勇一百五十七員名此二十四日官軍進攻古牧地奪壘奪關并擊敗援賊大獲勝仗之實在情形也據擒賊供安集延曾調集南路各城馬隊派頭目阿托愛管帶來此

助戰官軍馬隊獲黑馬一匹裝飾珍異卽阿逆坐馬惟阿逆下落  
尙不可知二十七日劉錦棠以古牧地關壘旣克輯懷城鎖圍已  
合各營攻具已備飭發開花礮轟倒東北兩面城垛各一二丈面  
商金順并飭所部各營分路急攻二十八日寅刻復轟坍城東南  
牆垛劉錦棠督弁丁三面猛攻城賊拌拒鏖戰兩時劉錦棠所部  
中軍及董字營突由東南角一擁而入金順所部與劉錦棠所部  
之派攻東北各營亦踴躍齊登將城中悍賊五六千人一併砍殺  
淨盡有逸出者亦經預派各馬隊截殺無一漏網拔出難民婦女  
幼孩甚眾劉錦棠以古牧地旣克守賊盡殲烏垣逆賊必聞風膽  
落乘勝直搗一鼓可下遂一面知會金順一面派隊於二十九日

奏稿卷四十八

美

黎明親督向烏垣進發經過卡壘一律踏平迨抵城東見賊已紛  
竄麾軍分途猛撲斬馘無數立將烏魯木齊迪化州城池及僞建  
王城同時克復馬隊躡賊緊追至鹽池墩一帶始還探報昌吉縣  
踞逆業已宵遁其瑪納斯呼圖壁各城已否克復雖未得確耗然  
亦斷難穩踞此攻拔古牧地克復烏魯木齊迪化州城池大概情  
形也臣維烏魯木齊各城爲新疆關鍵屬中原多故客回搆變土  
回隨之安集延以亡國之餘乘機竊踞南路重煩

朝廷西顧之憂蓋有年矣茲由關內籌餉集糧選將出師踰越重  
險會師進討甫歷四月連下堅城非荷

天恩軫恤征軍

特頒內帑各疆臣時艱同值仰體

皇仁推食解衣俾得踴躍前驅迅赴事機之會何以臻此惟餘孽猶存安集延狂寇兇燄雖熸尚未大加懲創是則區區微衷所難自釋者也所有官軍會師進剿攻拔古牧地堅巢克復烏魯木齊迪化州各城池情形先陳大概仰慰

聖懷其戰狀一切及賊蹤聚散分合辦理善後獎卹員弁各事宜俟金順咨報劉錦棠續稟到營再會同金順馳奏合併聲明伏祈皇太后

皇上聖鑒訓示施行謹 奏

光緒二年八月初三日內閣奉

奏稿卷四十八

七

上諭左宗棠奏官軍會剿賊匪大獲勝仗攻拔堅巢克復烏魯木齊等城大概情形一摺左宗棠督飭西甯道劉錦棠率各營會同烏魯木齊都統金順所部於本年六月間由濟木薩西進逆首白彥虎由紅廟子移踞古牧地糾合該處回酋併力迎敵安集延亦遣頭目率黨助戰官軍會襲黃田賊卡分途進擊陣斃悍賊甚多踞賊敗竄官軍緊躡追殺直抵古牧地各將領鼓勇齊進遂奪其壘立將南關攻破六月二十七日劉錦棠會商金順率所部急攻開放大礮轟塌城堞二十八日各軍踴躍登城將城中悍賊五六千人殲除淨盡二十九日乘勝進剿烏魯木齊踞逆經過卡壘一律踏平該逆紛紛竄遁斬馘無數立將烏魯木齊迪化州城池克

復勦辦甚爲得手左宗棠規畫調度洞中機宜金順劉錦棠勦賊奮勇均堪嘉尙所有一切詳細情形及應行獎卹各員卽著該大臣等查明具奏仍著督飭各軍實力勦辦并查明逆首白彥虎等下落毋任漏網以靖邊疆欽此

奏稿卷四十八

美

遵查吉爾洪額揭參金順各款失實摺

光緒二年七月十八日

奏爲吉爾洪額揭參金順各款均屬失實遵

旨按款查覆以明軍政恭摺仰祈

聖鑒事竊<sub>臣</sub>前欽奉

上諭吉爾洪額奏揭參統兵大員縱恣各款一摺據稱都統金順扶同欺罔剋扣軍餉虛設營數畏賊如虎勒買民糧私受節規庇護匪徒騷擾臺站縱僕招搖私娶逆婦等語該都統被參各款是否屬實著左宗棠確切查明據實具奏毋稍徇隱原摺著鈔給閱看欽此<sub>臣</sub>跪聆之下正值籌辦出關事宜及進駐肅州料理啟行竊以古城濟木薩行營相距太遠吉爾洪額所劾金順各款非到肅後按款訪查不能得其確實比到肅後訪之眾論參調案卷往復轉折致需時日始得要領敬爲我

奏稿卷四十八

克

皇上略陳之吉爾洪額劾金順扶同欺罔一款原奏稱巴里坤領隊沙克都林札布不欲赴任金順爲其捏病請畱查沙克都林札布并無告病文牘金順前因

諭旨垂詢能否回任曾奏請該領隊堪以回任是沙克都林札布既無捏病之說金順亦無爲其請畱之事金順雖旋奏畱該領隊在營亦未嘗代其捏病原奏指其扶同欺罔者謬也原奏稱剋扣軍餉查金順舊部餉事有無剋扣吉爾洪額無從得知所稱剋扣自係指接統景廉所部而言景廉所部本有專餉與金順之餉向

不相干當金順接統時糧臺無見銀移交僅以私貨算抵而又多  
滯銷之貨人所共知金順無銀散給不能不減舊部之餉勻濟接  
統之軍接統之餉既由勻濟而得其數自不及前以貨算抵之多  
然金順管餉各員既未經手支發何所施其剋扣至吉爾洪額所  
帶吉江馬隊專餉每月應發銀一萬六千兩按三月一次由戶部  
放給吉爾洪額自領自發金順既不經手從何剋扣原奏指其剋  
扣軍餉者謬也原奏稱虛設營數查靖邊振武果勇親軍馬隊各  
營合稱三十餘營金順接統併爲十九營先後均有奏案多設少  
設孰實孰虛何可誣也原奏所稱虛設營數者謬也原奏所稱金  
順畏賊如虎指上年滋泥泉之役而言查古濟以西軍事本未整

奏稿卷四十八

全

理金順於所部外鮮可信心卽所部亦難言稱意謂其因循未加  
振作貪多不求精實致進取徒託空言尙或近之至譏其畏賊如  
虎則未勉太過且是役吉爾洪額帶隊同行何不整軍以待而獨  
以此譏切主將乎滋泥泉距濟木薩止百五十里距阜康九十里  
距古牧地賊巢則二百餘里謂金順以久歷戎行之人於二百里  
外偶聞賊信卽恆怯退回似無是理原奏稱畏賊如虎者謬也原  
奏稱勒買民糧查古城糧價先頗平減後漸昂貴前年夏季每石  
二兩八錢冬季增至三兩三錢上年春季則已長成四兩由於從  
前訂價過輕故耕墾者少迨兵勇愈集軍食愈增而價亦逐漸昂  
貴民間閉糶居奇有之已領價而不交糧亦有之金順上年春聞

訂買之糧每石四兩至五兩後又加至六兩然以每石三百四十斤計之則較歸包甯夏採運之糧每百斤需銀八兩有奇核算價值尚減四倍較關內採運每百斤需銀十五兩有奇核算價值更減七倍矣使金順早爲籌畫加糧價以勸耕散牛籽以廣墾則古濟之糧不可勝食何至倍價採買尙難見新致吉爾洪額翻以勒買民糧爲其罪至勒買民糧一說臣實無所聞金順縱有勒買民糧之事亦因市價漸增加價採購并非抑價強糶之比原奏所稱勒買民糧者謬也原奏私受節規查烏魯木齊都統尙有節規與否無由稽考烏城未復金順尙在軍營無任可到似無節規可收軍營弊事不一而足然除糧餉保舉外無從作弊節壽非軍中所

奏稿卷四十八

全

有名目金順尙無貪聲營員同一窘況誰實取之誰實與之不能指參卽無從查詰原奏所稱私受節規者謬也原奏所稱庇護匪徒指邢長春一案而言查邢長春係古城商民在兔兒橋開集義成磨坊并往來濟木薩三臺等處運販貨物上年十月初十夜吉爾洪額據其營務處謝德清稟稱兔兒橋寄寓游民十數形迹可疑當卽飭統領倪敬修查拏旋經倪敬修訊明非匪當夜省釋十五日商民邢長春吳寶亭赴金順處呈控初十夜有官兵百數十人到磨坊口稱查夜開放洋槍將商民等一併綁縛所有銀兩貨物衣服搜搶無存旋經倪敬修帶回訊明釋放懇請究追金順以邢長春如窩藏匪民則白晝搜查亦無不可何必夤夜往查又何

必開放洋槍驚動市肆邢長春等到案倪敬修一訊卽釋既未究出爲匪實情又未起獲賊據商民平白受害懇請究追豈可置之不理吉爾洪額因此懷憾乃以庇護匪徒爲金順罪然還問邢長春等之爲匪與非匪吉爾洪額亦不能確指也旣不能指邢長春等爲匪徒自不可誣金順爲庇護原奏所稱庇護匪徒者謬也原奏騷擾臺站自指傳用官駝而言查西路軍營向來領餉各差每藉帶辦軍裝爲名販運私貨由張家口綏遠城兩路行走所運私貨到營以之抵放月餉軍中傳臺每次需用官駝動以數十百隻計沿途需索供應勒折羊價久爲臺務巨蠹金順接統各營以後查無以貨抵餉之事非緊急要差未嘗由臺行走所需軍裝等項

奏稿卷四十八

全

均由山西包頭雇用商駝轉運來營烏里雅蘇臺綏遠城張家口及各城歷次傳臺案檔可以行查旣未輕用官駝自無需索騷擾情事吉爾洪額踵行舊弊濫用傳單銷售私貨自知迹不可掩乃指商人韓文秀回京一事藉相抵制見在行查尙未得有實據原奏所稱騷擾臺站者謬也原奏稱縱僕招搖指王鴻義而言私娶逆婦指馬四之妾而言查在軍與在官不同供使令奔走者非戈什卽親兵閒亦用僕從服侍不過三數人取免私役兵丁之議已耳金順之有僕無僕及僕中有無王鴻義其人臣無從查悉惟原奏王鴻義等恃寵橫行所到之處迎送恐後與各統領營官結盟拜會攬權納賄稍不如意立遭典刑似王鴻義勢燄薰灼非尋常

僕從可比各統領營官均與結盟拜會眾口難防必滋物議攬權  
納賄必有過付之人稍不如意立遭典刑必有被害受屈之人然  
臣每遇軍中往來員弁畱心訪問并無知王鴻義者亦無被屈申  
訴者原奏自不足憑桂斌聞係西安駐防保至副都統充金順營  
務處因被金順劾奏治罪復因看管疏防桂斌旋即跨馬潛逃圖  
奔榮全軍營中途被賊拉去見聞白逆令其句致弁丁入夥軍中  
陸續逃逸者頗多又聞安集延酋帖爾向白逆索桂斌等赴南路  
均未知確否此事未准金順函知臣已密飭劉錦棠畱心偵察具  
稟原奏桂斌因觸王鴻義之怒卽行拘囚幾至餓斃亦殊失實至  
肅州攻克城中老弱婦女悉數由臣派員按賊造戶冊點驗分寘

奏稿卷四十八

三

營傍廢壘首逆馬四眷屬其時已分撥提督徐占彪派員看管事  
定一併解省發落馬四之妻馬馬氏妾馬張氏親屬劉徐氏姪婦  
馬劉氏等曾經臬司楊重雅訊供詳辦旋據詳稱馬馬氏供係肅  
回馬倫之妻馬張氏係漢民包瑞之妻馬劉氏係劉徐氏之女劉  
徐氏之夫卽陣亡烏魯克等子備劉耀均各供實係良民婦女  
被賊搶擄爲妻妾爲姪婦并非該逆等真正親屬當經批飭有親  
屬者給親屬領歸無親屬者由官擇配事前萬目共覩事後案卷  
可據金順未曾私納逆婦不待辨而自明不待查而自悉原奏并  
稱乘車拜客二三品頂帶官數十員前呼後擁玷辱名器金順是  
否另娶有妾實有其事臣無所聞原奏所稱縱僕招搖及私娶逆

婦均謬也竊聞吉爾洪額情性乖張景廉亦深知之當去任時忽加委任而以屬之金順金順接統該軍以後吉爾洪額每與齟齬嫌怨日深此次吉爾洪額參奏金順各款非逐一查明固難折服然卽詳加開導冀其降心相從恐合之兩傷終虞決裂見值進兵會勦之際未可依違遷就致誤戎機謹遵

諭旨將原奏各條確切查明據實陳覆伏祈  
皇太后

皇上聖鑒訓示施行謹 奏

軍機大臣奉

旨畱中欽此

吉爾洪額等俟押解進關訊供請

旨片

光緒二年七月十八日

再前摺繕畢正拜發開欽奉六月十七日

寄諭金順奏特參副都統吉爾洪額不遵節制吉爾洪額因病請假該員所帶之隊經金順派令沙克都林札布前往接統乃吉爾洪額抗不交代輒將沙克都林札布禁錮室中并有令眾兵向沙克都林札布索取欠餉等情似此任性妄爲不遵軍律殊堪痛憾著左宗棠按照所奏各節認真查辦據實具奏其所統官兵卽著金順飭令迅速交出不准藉詞延宕一面先將該副都統看管聽候查辦金順原摺著鈔給左宗棠閱看欽此臣以吉爾洪額前參金順罪狀已按款查明均屬虛罔此次因病請假復抗不交隊并將接統之沙克都林札布禁錮并令眾兵向其索領欠餉事前事後均未接准金順函牘臣無從懸揣茲閱原奏稱吉爾洪額率隊出紮構言惑眾意圖倡亂至斥爲亂臣賊子之倡是吉爾洪額鹵莽糊塗罪狀昭著

奏稿卷四一八

全

諭旨交臣認真查辦臣固不難據實直陳惟金順業已會師前進吉爾洪額尙未奉到革職明文是否迅將所統官兵交出聽候金順委員看管尙未可知誠慮操之過蹙復與金順齟齬似於大體非宜遂由驛照會吉爾洪額宣布

諭旨明示禍福并稱古城至大石頭一帶見商金都統撥隊分防令其懍遵交隊聽候臣與金順調撥旋奉六月二十九日

上諭金順奏帶隊大員不遵節制阻撓進隊請旨懲辦一摺墨爾根城副都統吉爾洪額前因患病請假該員所帶馬隊經金順派員接統抗不交代構言煽惑迫金順派隊迎護軍糧該員復敢縱兵阻撓實屬任性妄爲記名副都統依勒和布驍騎校委參領永成主謀唆鬧幾釀事端吉爾洪額依勒和布永成均著卽行革職交左宗棠查辦以肅軍律欽此同日奉到

上諭著金順卽行派員將該革員等押解進關由左宗棠嚴行查辦按律懲治吉爾洪額所部官兵并著金順飭令接統之員妥爲鈐束毋任滋生事端原摺著鈔給左宗棠閱看等因欽此吉爾洪額等革職已奉

奏稿卷四十八

全

諭旨所部官兵不至被其脅制料無他虞一俟押解進關臣當訊明錄供請

旨遵辦謹附片陳明伏乞

聖鑒謹 奏

軍機大臣奉

旨覽欽此

軍機大臣字寄光緒二年八月初三日奉

上諭左宗棠奏官軍剿賊大捷攻拔逆巢克復烏魯木齊等城大概情形一摺覽奏實深欣慰本日已明降諭旨宣示并令將出力陣亡各員奏請獎卹矣逆首白彥虎率黨踞守古牧地見經官兵攻拔堅巢斬殺甚多該逆與阿托愛見往何處竄匿仍著查明具奏烏魯木齊迪化州等城之賊詞知古牧地既克自必聞風先遁此次雖經克復城池其黨類究竟竄往何處著左宗棠金順督飭各軍探明賊蹤迅速進剿盡殲醜類一面添撥隊伍會合提督孔才等軍迅將瑪納斯呼圖壁各城攻拔毋任久踞見在大軍鼓行而西賊勢窮蹙難保不乘隙紛竄北路地方空虛可慮左宗棠前

奏稿卷四十八

全

調錫綸赴沙山子一帶豫籌截剿著卽知照該領隊大臣加意防範遇有賊至卽行邀擊遏其竄逸并著榮全額勒和布車林多爾濟杜嘎爾托倫布保英桂祥英廉勤加偵探先事籌防以杜窺伺吐魯番爲南路門戶見在烏魯木齊旣克卽須規復吐魯番城扼賊咽喉則南路各城不難次第戡定左宗棠素嫻軍旅自己成竹在胸卽著妥籌調度迅奏膚公左宗棠另摺奏革員桂斌聞有被賊拉去令其句致弁丁入夥之事著金順嚴密訪拏押解左宗棠軍營訊明治罪另片奏革員吉爾洪額等俟押解進關遵旨訊辦等語前據托倫布等奏吉爾洪額等業已帶隊行抵博東齊河地方當經諭令金順派員攜帶糧餉馳赴科境將此起官兵帶回調

遣著金順仍遵前旨辦理左宗棠侯該革員等押解到營卽行從  
嚴訊辦將此由六百里各諭令知之欽此

奏稿卷四十八

全

哈密威儀軍應行汰併摺

光緒二年七月十八日

奏爲哈密辦事大臣兼帶威儀一軍應行汰併以節虛糜而昭核實恭摺仰祈

聖鑒事竊臣於本年正月初三日具奏文麟兼帶馬步遵

旨裁併實數懇

恩敕撥有著專款定限撥解以資整頓一摺奉

旨戶部議奏欽此嗣准戶部鈔咨內開文麟所部減爲馬步各兩營又親兵二百名其餉需經臣議奏照楚軍章程合之糧價每月共銀二萬兩文麟又稱需銀三萬兩數目迴殊究竟哈密防軍應留幾營其隨營員弁夫役名數需人若干每年需餉若干卽由臣

奏稿卷四十八

五

與文麟核實妥定奏明請撥後再由部核明指撥等因當經轉咨查照迄未據咨送花名清冊前來臣亦未便催促旋准明春咨稱文麟因病身故所遺威儀一軍請揀員接帶臣比咨明春會同張曜查點實在人數分別造冊送核茲准咨送點驗花名清冊七本到臣內威儀軍員弁勇役共二千五百六十六員名除點驗未到實只二千三百一員名按文麟從前所開人數短一千三百四十四員名此虛數之宜節者威儀各營除將領營哨各官外隨營員弁多至一百數十員名而哈密沁城屯田每屯有官每棚有長又有文案海查藍旂傳號差官親兵各員弁不知何所用之員弁一人薪水抵勇丁數名口分而有餘見在餉絀且絕猶可任其坐食虛

糜乎此冗雜之宜節者哈沁各城屯丁多由外處避賊流徙而來土著最少計奇臺古城濟木薩迪化州鎮西廳漢民居十之九安西所屬漢民居十之一川陝客民僅十九名耳哈密地方本纏回世業大軍徑抵阜康奇臺古濟一帶難民既思歸故土而本地纏回之流徙吐魯番者將來復業鵲巢難任鳩居幸值豐稔自宜預爲籌維屯丁一撤事可兩利此浮費之宜節者臣前與明春張曜函商意見相同惟裁汰冗雜員弁宜酌給川資整理伊始宜酌籌經費均由臣於軍餉內量爲挪墊以期妥速俟明春張曜覆到速將文麟任內一切料理完結一面奏請

奏稿卷四十八

卒

敕撥該軍有著的餉定限撥解乃可漸收餉節兵精實效而明春接統該軍亦可免宿累牽擾矣謹據實陳明伏乞

皇太后

皇上聖鑒訓示謹 奏

軍機大臣奉

旨知道了欽此

